

IHUAQNIGHAKKUT PARNAIYAIYUT

Ilihaqtut Maliktaghait

ATANIQTUQTUINIQMUT ILIHIMAYAGHAT:

Ayuiqhaiyut Ilihimaghainik

Makpiraanguyut Miiyanut

Katimayinullu

Nunavunmi Nunallaarnit Ilihaiyit Katimayiit



NAUNAITKUTAT MAKPIQQANUT

QANUQ ATUQTAUYUGHAT HAPKUA MALIKTAGHAT 1

ILITTUQHITIT 2

ILANGA I - HUNAUYUQ IHUAQNIGHAKKUT PARNAIYAINIQ? 2

Ihuaqnighakkut Parnaiyainiqmut Ilihimaghat 2

Hunauyuq Ihuaqnighakkut Parnaiyainiq? 2

Hitamauyut Avighimaniit Parnaiyainiqmut 5

Ikayutit taapkununnga Nunallaarnit Ihuaqnighakkut Parnaiyautit 6

Ihuaqnighakkut Parnaiyainiqmut Ilihimaghat: Ingmingnut-Qauyihautit 8

ILANGA II - QANUQ HANAYAAMIK IHUAQNIGHAKKUT PARNAIYAUTINIK 9

Kaivitaqtut Ihuaqnighakkut Parnaiyautinut Havauhiit 9

Havauhiq 1: Parnaihimallutit 10

Havauhiq 2: Ilittuqhitilugu Ihivriugluguluuniit Ihumagiyatit, Havaaghatit, Ikpigiyatillu 11

Havauhiq 3: Atuqtamingnik Qauyihailutik 13

Havauhiq 4: Titiraqlugit Inirumayitit, Ihuaqnighakkut Havauhighat, Havauhirniklu 15

Havauhiq 5: Titiraqlugit Atuqtittilugulu Ihuaqnighakkut Parnaiyautit 17

Havauhiq 6: Munarilugit Qauyihaglugillu Qanurininganiit 21

Havauhiq 7: Ihumaliuglutik Titiratqigiamik Nutaannguqtiqluguluuniit Parnaiyautit 23

Ingilrutit Ikayutitghat Parnaiyaiyaamik 23

Ihumaqhuliuglutit 23

Ihumaliugaqnut Naunaitkutat 23

Avatinik Ihivriughiyut 23

HAAH-nut Qauyihautit 24

Irininaqtunik parnaiyaiyut 24

Qaritauyakkuurutinit Naunaiqhiviit 25

Qanuq titiraqtuiyaamik Ihuaqnighakkut Parnaiyautinik Ingmingnut-Qauyihautit 25

TAIMAAQTIRUTIT 26

UGUAT 27

1. Ihumaliugaqnut Naunaitkutanut Havauhiit 27

2. Avatinik Ihivriughiyut Titiraaghat 30

3. HAAH-nut Qauyihautinut Titiraaghat 31

4. Ihumagiyayut, Havaaghat, Ikpigiyayunullu Titiraaghat 32

5. Havaaghanik Parnaiyaiyut Titiraaghat 33

QANUQ ATUQTAUYUGHAT HAPKUA MALIKTAGHAIT

Ataniqtuqtuiniqmut Ilihimaghat tukliringuyut ilihagtaghat hanayauhimagut taapkunanga Nunavunmi Nunallaarnit Ilihaiyit Katimayit (MTO) ikayuutighait Miiyayunut Katimayinullu ayuiqhahiyaamik ilihimaghainik ihumaliurniqmik munaqtuniqmiklu qauhimattiarniqmik ilihimattiarniqmiklu

Una titiraq, *Ihuaqnighakkut Parnaiyaiyut Ilihaqtut Maliktaghait*, atauhiyuyq qaffiuyunik ilauiyq ilihagtaghanut hapkunani aghuurnaqtuni unipkaanik.

Ilihaqatauguvit katimaqatauyunik hivuliqtiqaghutik ilihaiyimik, ilihagtaghanit pivighat iliqahiutihimagut ilittiarniqmut qunngiagaghaq, ilihagtagtit titiraqtaghait, titiraqhimayullu qaritayakkuurutinit ilihaitjutighat. Ilihaiyuyq tuniniaqqaatit makpiraaqnik ihariagiyanik ikkuaqtiuniaqhuni ilihagtagtit apluqtaghat malighugit.

Iliharuvit ilikkut, ilihalluaqtaghatit qunngiagtaghamiittut, hapkunani maliktaghanit, ahinilu qaritayakkuurutinit pivighanit. Pihimaitkungni huli, qunngiagaghaq, makpiraaq, ahiillu ilauiyut pivighat qaritayyanit piinnarialgit MTO-kut qaritayakkuurutainit.

Inmikkut ayuiqhahiyaamik, qunngiagaghaq taamnalul Ilihaqtum Maliktaghait atuqtauyughat atauttikkut:

- 1. Aullaqtiqlutik qunngiagaghanut.**
Aviktuqtauhimaguyq qaffinut naittunik ilihautighanut haniliriiktunik parnaiyaqtauhimaguyunut Ilihaqtut Maliktaghainit. Qunngiagaghaq iniqtaugumi, nutqaquiniqtauyq qunngiagtaghanit hanaquyaulutillu ilanganik pitquyauhimagut havaaghat.
- 2. Havaarilugit havaaghariyatit.**
Havaaghat iniqhigaangat ilihagtaghanik taapkuangulaqtut:
 - Taiguanginnaqhutik nakatamik Ilihaqtum Maliktaghainit
 - Ihumagiplugit qanuq ihuaqhainahuarniarumik ihuilutunik Katimayiplutik
 - Qaritayakkuurutinit atuqhutik pivighanik qiniqhiaplutik ikayuutauniaqtauyq hivunighami
- 3. Aullaqtiqklugu qunngiagtaghat.** Talvanngat, hivumuqlutit tuklianut qunngiagtaghanit ilihagtaghanut. Taimaa havauhiit qulaani atuqhimmaaqlugit iniqhiilugit tamangnik ilihagtaghat.

Taimaa, iniqhimalirungni ilihagtaghat, apiqhuutighaqaruvit kiuyauhimaittunik, Katimaqatigiyatit nunallaarniluuniit havaktit kiutjutighaqarungnaqhiyut ilingnut – imaaluuniit nani kiuyaulaarumik.

Ilaa, qauhimayatit taapkununga Ihuaqnighakkut Parnaiyaiyut ihumaliugait havauhiillu akliyaallirniqtauyq havaaghat iniqpalliagumik upluq tamaat Miiyatut Katimayitullu.

QUANAQQUTIT!

MTO-nguyuyq quyagiyumayait ikayuqpiiaqtut Nunattiamit Havakviat Nunallaarnik Nunallaarmiullu Ikayuqtiit, Ilihaqviat Nunallaarnit Kavamaliqiniqmik, titiraqpakkamik taapkuninnga *Parnaiyaiyut: Maliktaghat Iniqhittiarumik* Ilihaqtut Maliktaghait hailiyauhimaguyq pivighatut hapkununga makpiraaqhiyuyq.



ILITTUQHITIT

Ihuaqnighakkut Parnaiyautinik titirariamik nunallaarnut taimainnahuquuqtuq, hivuani, ayuqnarniaqtutut. Kihimi, ihumaaluktaiquyauniaqtuhi ahinit havaarihimayaanit taimaa iniqtaulaaqtut aittuqtaunnaqhunilu.

Ihuaqnighakkut parnaiyaiyaamik apluraqhutik-apluraqnik havauhiyuq taapkua Katimayiit atuqpagait hivumut ingilrayaamik, naatkutigiighugit ihariagiyaait piyumayailu aallatqiiktut katimaqatigiit nunallaarnit tajja iniqtaghaqaqhutik pivighailliuqhutiklu hunaqutanik. Ihuaqnighakkut parnaiyainiq nannganaqtuq – tautuquuqhugit aliattangnaqtut havaaghat hivunighami – kihimi qauhittiarnaqtumik ilittuqhitiyuq kitut *iniqtauyughat*, kitut *iniqtaulaaqtut*, qakugulu *iniqtaulaaqqat*. Ihumagiyaahimayuq talvuuna taamna nunallaaq humiittumayaaghainik tallimanik ukiunik hivunighami, qaffiyyunik ayuqnavyaktut iniqhiyumayainik, havauhighat iniqhiyaamik, kitullu havauhillaat ingilratjutauniat hivumut.

Hapkua Maliktaghat aviktuqhimayut malrungnut. *Ilanga 1 – Hunauyuq Ihuaqnighakkut Parnaiyainiq?* Ilittuqhitiyut hunauyaaghaat ihuaqnighakkut parnaiyainiq, qanuq atuqtauvaktuq, qanuqlu ihuaqtukkut atauttikkuuriaghait ahiillu, hivikittut parnaiyautit haamlatkut parnaiyaqpagaita (taapkuatut Maniit Atuqtauyughat, Angiyunut Parnaiyautit, Aulapkainiqmut Parnaiyautit, qanuqlu). *Ilanga 2 – Qanuq Ihuaqnighakkut Parnaiyautiliuriamik* uqauhiqnik tuhaqtittivaktuq ilittuqhitivaghuni qanuq havauhiriyaamik.

Naittukkut, hapkua Maliktaghat ilittuqhitivaktut:

- Ihuaqnighakkut Parnaiyainiqmut ihumaliukkat uqauhillaallu

- Huuq Ihuaqnighakkut Parnaiyainiq nakurutauyuq.
- Qanuq Ihuaqnighakkut Parnaiyautiliuriamik.
- Ihumagilluaqtauyut talvani Ihuaqnighakkut Parnaiyautinit.
- Kitut ilaayughat – qakugulu.
- Qanuq qauyihaiyaamik qauyihariamiklu Parnaiyautinik atuqtittiyut.

ILANGAI – HUNAUYUQ IHUAQNIGHAKKUT PARNAIYAINIQ?

Ihuaqnighakkut Parnaiyainiqmut Ilihimaghat

Hunauyuq Ihuaqnighakkut Parnaiyainiq?

Haamlatkunnit Ihuaqnighakkut Parnaiyautit angiyuq “piksautauyuq” parnaiyautik taapkua Katimayiit atuqpagait ilittuqhitiyaamik kitut aghuurnaqtut namunngauyumayaaghaalu. Ihumaliuqnaqhigumi aviktuqnaqhigumilu pivighanik, taamna Ihuaqnighakkut Parnaiyautik ikayuutauyuq itqaumagiyaamik nunallaam hivituyumi piyumayait.

Nunallaat kavamait amihunik ihumaliugaghalgit, haamlatkullu Ihuaqnighakkut Parnaiyautaittumik, Katimayiit taimaa apiqhuutigiliqpagait irinigiyaaita ihumaliuqtaghaqaraangata. Ihumaliuqhimagaangamik taapkua hivituyumik inirumayaita ihumagihimaittumik, ayuqnaittuq ahikkuuriamik.

Ihumaliuttiaqhimayut Ihuaqnighakkut Parnaiyautit kiuhihivaktuq pingahunik apiqhuutilluanik.

Humiitpita
tajja?

Humunn-
gauyugut?

Qanuq talvun-
ngaqniaqqita?





ILITTUQHITILLUAT

Ihuaqnighakkut Parnaiyainiq uqauhilik inmikkut. Hamma ilangi uqauhiit takuvangniaqtatit hapkunani titiqqanit.

Avatinik ihivriughitit: qauyihautauyut hilataanit ikpingnautauyunik aghuurutauvaktut timiqutinut aulattiarimingnik.

Iniqtaghaq: iniqhiyumayughanit uqauhilluanguyut maligaghaliuqhimayunit qauhitigiplugu kitunikiaq ihumagilluaqtainit.

Havaaghaq: uqauhiuyuq ilittuqhitiyuq timiqutim havaaghainik. Ilittuqhitivaktut timiqutit qanuriliuqpagiaghainik iniqhiyaamik kitumullu iniqhivagiaghainik. Qanuq tuhaqtittivagiagharnik niuviqtingnut (inungnut ikayuqtauvaktunut) ahinullu ilaayunut (nanminiqutilgit) huuqlu nunallaarnit kavamait talvaniittaaghainik, qanuq nakuruttiquagiaghainik mihingnautiqariaghainiklu.

Timiqutik: nunallaarnit kavamauyut ingilratjutaayuqluuniit (havakvik, aulapkaqtitauyuq, hunaqutik) talvuuna ihuaqnighakkut parnaiyautit havaangit atuqtauvaktut.

Havauhiqnik qauyihaiyut: ingilrutaayuq qauyihautauyuq qanuq havaaghat iniqtauvagiaghait qanuqlu iniqhitjutaayuq.

Ilauyut: timiqutit, katimaqatigiit inuillu nanminiqutilgit taimaaluuniit naahuriyunik havauhiqattiaqtughanik maliguattiarimikluuniit timiqutinit. Ilauyut atuqattanngitait hunaqutit ikayuqtauyuitulluuniit aullaqtitauhimagayunit. Niuviqtit atauhiyut katimaqatigiiktut ilaayunit.

Ihuaqnighakkut parnaiyainiq: aulahimmaaqtuq, havauhiuyuq hivumut-tautukpalliapluni timiqutit inirumayainnut havaaghainullu.

Ihuaqnighakkut parnaiyaut: iniqhiyumayughanit hanayauyughanut naunaitkutaayuq iniqhiyumayarnut, havaaghanut havauhighanullu iniqhiyaamik tautugumayarnik.

Havauhiq: havauhilluat (iniqhimayut) iniqhiyaamik havaaghaqnik.

HAAH-nut Qauyihautit: Titirauhiit atuqtauyut ilittuqhitiyaamik timiqutim **Hakugingniinik**, Ayuqhautainik, **Havaaghainik Amirnautinullu**. Ilauyuq Ilumiutanik/Hilataanilu Qauyihautinut timiqutiit iniqhivagait qauyihaiyaamik ilumiutanit atuqtauyut (**Hakungniit Ayuqhautillu**) hilataanilu ikpingnautit (**Havaaghat Amirnautillu**) mihingnautivaktut timiqutinut.

Havaqatigiit: Katimaqatigiiktut inuit havaqatigiiktumik iniqhinahuaqtut piyumayainik inirumayainiklu. Havaqatigiit havakpaktut uqautittiaqhimaplutik taimaalu pitquhiqaqpaktut:

- Havaqatigiiktumik iniqhiyumavaktut atauttimik iniqtaghamik.
- Kitunikiaq havaaghanik, piyumayainik, inirumayainiklu.
- Aulavaktut maliktaghakkut taapkuatut ihumagittiaqhugit ahiit ihumagiyaitalu.
- Uqautittiaqtughat uqautjaulutiklu ihuaqhivaalliriamik.
- Havaqatigiittiaqtughat katimaqatigiit havaaghaigut havauhiigullu.

Ihumagiyauyut: piksaluqhimayat uplumi nunallaat hivunighami qanurilinganiaqtuq.



Humiitpita tajja? Kiuhiyaamik hapkuninnga apiqhuutinik, ihivriuqtaghariyat tajja havaariyat ilittuqhilitugulu havaaghatit, ihumagiyatit, ikpigiyatillu.

Humunngauyugut? Una apiqhuutik ilittuqhitiqiyuq ilvit ilihimayarnik aullaqtittilugulu ihumagiyatit hivunighamut.

Qanuq talvunngaqnaiqqita? Una apiqhuutik akirautauyuq apqutighaliuriaqnik hivuaniittuq, atatapkailutik humiittaagharnik tajja humunngauyaagharniklu. Taimailiuriamik, iniriqhimaghatit ihuaqnighakkut havauhikkut piyumayatit, inirumayatit, hanaqiyauyughallu hunaqutik, titiraqhimalugu qanuq aullaqtiniariagharnik Parnaiyautinik.

Naittukkut, Ihuaqnighakkut Parnaiyautit:

- Nunauyatut iittuqhivitaktuq aghuurnaqtunik Katimayinut nunallaarmiunullu.
- Ikkuuqtuivaktuq Katimayinik ingilravighainut, qanuriliuriaghainik, huuqlu taimailiuriaghainik.
- Ikayuutauyuq Katimayinut katimaqatigiingniqmut ihumagiyainut uqauhiqariamiklu atauhiqmik nipiqaqhutik.
- Ilittuqhivitaktuq Katimayit hivunighami iniqniaqhimayainik inungnut parnaiyautauyuqlu nunallaarmiunut timiqutinullu havaaghainik havaariyaamik.

Parnaiyaiyut: Ilittuqhitiyuq

Ihumaliuriamik qanuq atuqniariaghainik pivighainnik timiqutim, hivituyumi, iniriamik piyumayaita timiqutim.

Haamlatkut Ihuaqnighakkut Parnaiyautait atuqtitauliqpaktut havauhigahanut parnaiyautikkut iniqtauyughanut, amihuuplutik atuqtauhimayunit, talvuuna atuqtittivallianikkut



TITIQTAGHAT: HUUQ PARNAIYAIYUT?

Angiqhimaqatigiigiamik hivumut ingilravighainut.

Nanikiaq nunallaarnit, amihuuyut aallatqiiktunik ihumaqaqpektut namunngauyaaghainik nunallaat. Parnaiyaiyut havauhiyuq katitiripluni tamangnik ihumagiyayunik tuhaqtittiplugit aniqatigiigahuaqhutik Katimayit huliyaghainut hulittailiyaghainullu.

Ilittuqhitiyaamik aniqatigiiktut.

Parnaiyautik – aniqatigiingniqmut havauhiyuq taimaa iniqhiyaamik – ikayuutauyuq nunallaarmut, maniktarvingnut, kavamatkut timiqutainut, ahinullu timiqutinut ilihimayaamik humunngauyaaghainik.

Ihumaliurutauyuq kitut aulattariaghainik kitullu aulattianngittut.

Parnaiyautaittumik, ihumaliurutighaittuq iniqhiyaaffingnik aghuurnaqtunik piyumayayunik. Parnaiyautiqaqhutik, ilitturinnaqtut kitut aulattiaqtut, kitut aulattianngittut, kitumiklu ihuaqhaiyaamik hivumuuqhutik.

Ikiqhivaalliriamik inikkut timiqutinillu unaguhuutit

Ilitturinnaqtumik ingilravighaittumik, kiuhiqyauniaqtutit tamangnut nutaanut ihumaaluutinut aghuuqtaulutiklu ilittuqhitiittumik aullaqtitauhimayunik inirumayanik irininaqtuniklu. Unagunaitqiyauyuq ilihimayaamik humunngauyaagharnik huuqlu.


Naahuriyaamik nuivalliyunik ayuqhautinik

Parnaiyaiyut taimaittuq naahuriyaamik ingilrauhinik ayuqhautiniklu atuqtautinnatik parnaihimaniqmiklu ihuaqhaiyaamik.

Aturahuattiaqhgut pivighatit.

Parnaiyainikkut ihuaqnighakkut atuqtittinahuaqpektuq ikittunnuuyunik pivighanik – upluqhiutinik, maningnik, inungniklu.

ahinik parnaiyautinik. Hapkua ihumagiplugit, taamna nunallaat Ihuaqnighakkut Parnaiyautit ihumagiyaulaaqtuq taimaa *qutangnaitjutit* parnaiyautit.



Hitamauyut Avighimaniit Parnaiyainiqmut

Uqaqhimayutut hivuani, Ihuaqnighakkut Parnaiyautit titiraqhimayulik ahinut, qauhittiarnaqtunik parnaiyautinik taapkua haamlatkut titiraqhimayaghait. Kihimi, Ihuaqnighakkut parnaiyautit inmikkut ikkuaqtuqtauyuuq uqaqhilluanguyunik tuhaqtittiyunik haamlatkut Ihumagiyainik, Havaaghainik, Ikpigiyaainiklu.

Talvuuna, nunallaarnik parnaiyainiq aulavaktuq hitamauplutik “avighimaniit”:

Uqauhiit Ihumagiyainut, Havaaghainut, Ikpigiyaainullu ikkuaqtuivaktut taimaa:

- Minguliqhiplutik piksautimik hivunighami nunallaam inirumayainik.

- Tuhaqtittiplutik Katimayit havaaghalluaganik qanuqlu iniqniaqhimayaaghainik.
- Tiguplugit atuqhugillu ukpiriyavut ikkuaqtuutiyut havaaptingnik – tajja hivunighamilu.

Ihuaqnighakkut Parnaiyainiq hivituyumik parnaiyautauyuq taimailiuqtumik:

- Angiyunik iniqtaghalik tallimanik ukiunik atuqtughanit.
- Ihumaliuqhimayut nakuuniqhanik naunaitkutaqaqhutik nunallaavit hilataanit ilumiutanilu avatiinit.
- Tunngaviyuq ukiumut, aulapkainiqmullu parnaiyainiqmut.

Aulapkainiqmut Parnaiyainiq ukiumut parnaiyautauyuq:


- Ilittuqhitiyuq naunaittiaqhutik iniqhimayukkullu qanuq taimaa, ukiumi atuqtughami, nunallaat ingilravallianaqtuqhivumut ilittuqhitihiyuuq talvani hivituyumi atuqtauyughanit parnaiyautinit.

Havaaghanik Parnaiyainiq parnaiyautauyuq iniqhiyaamik kitumikiaq inirumayarnik ikkuaqtuulutikluuniit kitumikiaq havaagharnik. Taimailiuqpaktuq:

- Ilittuqhitiyaktuq naunaittiaqhutik iniqhimayukkullu qanuq havaaghaq iniqtauniariaghaat qauyihaqtaulunilu inittariaghaanik.
- Ilauptilaaqtut havaaghanik iniqnarilaaqtunik qaffinik tatqiqhiutinik – qaffinikluuniit ukiunik – iniqhilutik, ihumagiplugit taapkua aktiniit ayuqnaqniillu.



Imaatut tamangnik naammagiittiaqpaktut.



Ikayuutit taapkununga Nunallaarnit Ihuaqnighakkut Parnaiyautit

Ihuaqnighakkut Parnaiyautinut Havaqatigiit taapkuanguyut inuuplutik tunngaviyut parnaiyainiqmut havaaghanut. Ilauyut hapkununga havaqatigiingnut taapkuanguvaktut:

- **Miiyauyuq:** parnaiyainiqmut hivuliqtiuyuktuq
- **Katimayit:** ihumaliuqtit katimayiralaanullu hivuliqtiit
- **SAO/CAO-nguyuyq:** unniqtiulluaqtuq, parnaiyi, naunaiqhiviupluni.
- **Atannguyaq Maniliqiyinit Titiraqtia:** unniqtuiyilluaq tamangnut havakvium iluani maniliqiyinut.
- **Havakviit atannguyait:** unniqtuiyilluat munaqtaghaita mighaagut.
- **Tikkuaqtuiyut ilauyughalluanik:** inuit nunallaarnit mihingnautiqalaaqtut taapkununga Ihuaqnighakkut Parnaiyautinit.

Aallat haamlatkunni havaktut ilauqyauniarungnaqhiyut ilangannik parnaiyaiyut havaanginnut taimaa katimayiuuplutik ihumagilluaqtainut “havaktitauhimayut katimayit”. Taapkuatut, havaktit talvanngat Maniliqiyit Havakvianit apiriyauuniarungnaqhiyut naunaittiaqhimayaamik maniliqiniqmut qanurininganianik ilittuqhitiyauhimaghaq talvani Ihuaqnighakkut Parnaiyautinit.

Kinauva taamna Nunallaarnit Ihuarnighakkut Parnaiyautinut Ilauyuyq?

Taamna ilittuqhitik “ilauyumut” ilaani qauhimattiarnaittuq.

Ilauyuyq taamnaulaaqtuq inuk, katimaqatigiit, timiqutikluuniit ihumavaktut ihuaqtukkut ihuittukkulluuniit ikpingnautaulaaqtuq inirumayainnut, piyumayainnut, havaaghainullu titiraqhimayut talvani Ihuaqnighakkut Parnaiyautinit. Aghuuqpaallirumannaqtut inuit



kivgaqtuiyut uqauhiinik ilittuqhitigiighutik nunallaarmiutat. Ihumagiplugu una ilittuqhitik, ihumagiplugu aktinia nunallaaq, ilaayut taapkuangulaaqtut:

Mikiyut Nunallaat:

- Nuatqatigiit
- Aulapkaiyiryuat angiyunik hannavingnik nunallaam iluani
- Nunallaarmiutat nanminiqnik aullaqtittilihaat taapkualu nanminilgit
- Kivgaqtuiyut nunallaarnit ilihaqvingnik
- Kivgaqtuiyut aanniaqtuliqiyunit inuliqiyinillu havakviinik
- Kivgaqtuiyut nunallaarnit angaatjuvingnik
- Inulrammiit katimayit
- Nunallaarnit kivgaqtuiyut qitiqmiunit/aviktuqhimayunit kavamatkut havakviinik
- Ikpiguhuutilgit ilaayut havaktiunngittut haamlatkunnit, kihimi annirnaqtut aulapkaiyaamik (taapkuatut, katimaqatigiit havaktinut, kaantulaaktitayut ikayuqtit)
- ... ahiillu

Angiyut Nunallaat:

- Aulapkaiyiryuat inuit qulliqtuutainik
- Aulapkaiyiryuat nunallaarnit nanminilingnut katimayit
- Kivgaqtiit ilihaqpaalliqvingnik
- Kivgaqtiit ikayuqtinik/inuuhiqattiaqniqmut havaaghanik aullaqtittiyut katimayit
- Tutquumaviit atannguyait
- Tuhaayaghat ahiillu tuhaqtittiyut kivgaqtiit
- Kivgaqtiit Kavamaunngittunik Timiqutinik (NGO-nguyut)
- ... ahiillu

Huuq ilaayunik ilaupkaiyaamik ihumaliuttianguva?

Nakurutayut ilaayut katimaqatigiyaamik hanayut Ihuaqnighakkut Parnaiyautinik taapkuanguyut:

- Ihuatqiyauyuq ihuaqnighakkut hanavalliayaamik aallatqiingnik naunaiqhitivaktunik, uqauhiqnik, qauhimayaniklu.
- Nunallaarmiutanut ilauvaktunut naunaiqhitiyuq Katimayit inirahuaqtainik.
- Ihuatqiyunik havaaghanik tikkuahivaktut.
- Angiqtauhimalutik ilitturinnaqlutiklu ihumaliuqhimayait ihumaliurniqmullu havauhiinit.
- Iniqniaqhimalugit nanminiqutigilugillu ihuaqnighakkut aullaqtirutait.
- Havaaghat hakugighaiyaamik hanatuniit ayuiqhaplutiklu timiqutinik kikkililuhimayunik.
- Hanavalliyut havakvingnit havaktighanik nanminilingnit aviktuqhimayunilu havaaghanit

Ilaupkaiyut Ayuqnaqtunut Ikayuqtinik

Iharianaitkaluaqhuni, ihumaliuttiaqnaqtuq ilaupkaiyaamik unniqtuiyunik ayuqnaqtunut ikayuqtittilugit hanatillutik Ihuaqnighakkut Parnaiyautinik. Ikayuqtighailluriamik ayuqnaqtunut qaffinik nakurutilik:

- “Hilataanirmiut” ayuittumik ilihimattiaqtumiklu ilaulaqtuq taimaa ilumuuqtutut maniliqiyit – ihumagiyaunik unniqtuipluni ihumaliuqtauhimaittunik hivuanit atatayumik nunallaarmut.
- Tikkuqtauhimattiaqtut unniqtuiyit ilihimayainik ilittuqhitivaktut ayuitamingniklu ihariagiyaulaqtut haamlatkunnit havaktighaliuqhutik atauttikut.
- Unniqtuiyit ayuqnaiqpaalliutivagait havaaghaita parnaiyaiplugu parnaiyautit.

Ayuqnaqtunut unniqtuiyut ikayulaaqtut ilanganik tamangnikluuniit hapkuninnga:



- Parnaiyaiplugu havakviup hanauhiata taapkua Ihuaqnighakkut Parnaiyaiyit Havaqatigiit.
- Havauhilluakkut havakviqarlutik aullaqtiqvianit taimaaqtiqvianut.
- Ilittuqhaiplugit aallatqiiktut inuit tikkuaqtauyughat aallatqiingnut havaktitauyunut katimaqatigiingnut, ihumagiplugit ihariagiyaat nunallaam, ayuitait, katimaqatigiiklu kivgaqtuqtait.
- Ilittuqhitiplutik katimapkaiplutik aullaqtilihaaqtut havauhiinit.
- Hanaplugu naunaitkutanut tutquumaviit atuqtainik qauyihariamik.
- Ikkuuqtauplutik nunallaarnit parnaiyiniq havauhikkut.
- Uqaqtiupluni katimayunit.
- Titiraqhugu kingulliqaat titirautait Ihuaqnighakkut Parnaiyautinit.
- Ilittuqhaiplutik havaaghanik nakuuyukkut tuhaqtittiyikkut ilittuqhitiyauyaamik, ikayuqhutik parnaiyainiqmik inuit katimavighainik, ilaupkaivallianahuaqhugit



APIQHUUTIT APIRIYAGHAT PARNAIYAIPLUTIK.

- ☐ Humik nunallaat naahurivat uvaptingnit?
- ☐ Humik naahurivita uvaptingnit?
- ☐ Qanuriliuqtughavita?
- ☐ Qanuq hivunighavut tautugumavitku?
- ☐ Qanuq talvunngaqaqita?

katimayunut nunallaarnilu qauhitivallialugit qanuq parnaiyaiyut havaaqariaghait.

- Ihuaqnighakkut havauhiqnik atuqtittivalliyut.

Nakurutaugaluqhutik, ayuqnaqtunut unniqtuiyut iniqhimayaaghainik munaqtiuyughaunngittut hanayunik Ihuaqnighakkut Parnaiyautinik. Miiyauyuq, Katimayit, haamlatkullu titiraqtiit nanminirilugu havaariyaghaat. Unniqtuiyit ikayuqpaktut. Haamlatkut hivuliqtuivaktut.



IHUAQNIGHAKKUT PARNAIYAINIQMUT ILIHIMAYAGHAT: INGMINGNUT-QAUYIHAUTIT

1. Kitunik pingahuuyunik apiqhuutinik taamna Ihuaqnighakkut Parnaiyautit kiuhiavkpa?
✓ Ihivriuriamik, takulugu *makpiraq 4*.
2. Taamna Ihuaqnighakkut Parnaiyautit ilittuqhitiyuq taapkuninnga "qutangnaitjutit parnaiyautinik." Qanuq taimaa qauhittiarnaqqa?
✓ Ihivriuriamik, takulugu *makpiraq 4-5*.
3. Qanuq havaaghaqqaqat Katimayit taimaa ihuaqnighakkut parnaiyaiplutik?
✓ Ihivriuriamik, takulugu *makpiraq 6*.
4. Kitut ilittuqhitiunaqqaqat taapkuninnga Ihuaqnighakkut Parnaiyaiyunut *ilauyut*?
✓ Ihivriuriamik, takulugu *makpiraq 7*.
5. Qanurittumik havaaghaqarniat, piqaqqaqat, taapkua ayuqnaqtunut unniqtuiyit hanayunik nunallaarnit Ihuaqnighakkut Parnaiyautinik?
✓ Ihivriuriamik, takulugu *makpiraq 7*.



ILANGA II – QANUQ HANAYAAMIK IHUAQNIGHAKKUT PARNAIYAUTINIK

Havauhiyuq hanaplutik haamlatkunnit Ihuaqnighakkut Parnaiyautinik ayuqnaqtughaunngittuq. If havaaghariyauyuq nutaannguqtiriamik hivulliqnik Ihuaqnighakkut Parnaiyautinik aallannuqtiqlugu atuqtauvia tallimat-ukiut taimaaraangat, havaaghat iniqtauvaktut avatquttailiplugit qaffiyut Santiit tamangnik ilauyut ilihimattiarumik iniqhittiarumagumiklu havauhiqnik.

Taimaa hanayughauguvit – hanayumaguvilluuniit – nutaanik parnaiyautinik nunamit qunmut, taapkuatut nutaat Katimayiit havaktitaurumik niruaqtaaqhimaliqqata haamlatkut, havauhiit ayuqnaittut huli. Hivituuyutqiyauniaqtuq kihimi.

Katimayiit qarritjivaktut amihunik ilihimayainik nakuuyumik parnaiyaiyaamik: iniqhiyumayuktut nakurutighainik nunallaat; ilihimattiaqtait inittiarumaniq iniqhiiniqlu; iqhiittutiklu aniaqattariamik nipliqhutik ihumamingnik. Taapkua aajjikkutauyut ayuitait ikayuutigiyait niruaqtauyaamik Katimayinut ikayuutigivagait katimaqatigiyaamik haamlatkut ihuaqnighakkut parnaiyaiplutik.


Amihuuyut haamlatkut Ihuaqnighakkut Parnaiyautait amihuuvaktut makpiqqat titiraqhimayut, kihimi taimainngitkaluaqlutik. Ayuqnaitqiyauniaqtuq tuhaqtittiyaamik Parnaiyautit titiraanginnik nunallaarnut taimaa piksaluqhimayukkt PowerPoint-mik, qaffiniklu naunaitkutakkut, nivinngaqtaghakkut naunaitkutakkut, avugiiktumikluuniit havauhikkut, taki ai? Aghuurnatqiyauyuq tuhaqtittiyaamik Parnaiyautinik ilitturinnaqtukkt qauhimmattiarumagumik ilauyunut.

Taamna haamlatkut Ihuaqnighakkut Parnaiyautait aniguqtitaupat, inirumayaita aallannulaittut kihimi Parnaiyautit talvaniighaarumik titiraqhimayaatut atuqtauvighaanit. Kihimi, ihuaqhaivangniat ilangi ilikkuuqtut havauhighat havaaghanilu iniqtauyughat naahuriyauyutut. Ukiuq tamaat hitamaiqtuqhutikluuniit naunaiqhitjutit aulattiaqniinut havaaghainit nuivalliyut Parnaiyautinik ikayuutauniaqtuq Katimayinut havaktinullu ihumaliuriamik ihuaqhaiyariaqqaqat.

Kaivitaqtut Ihuaqnighakkut Parnaiyautinut Havauhiit

Ihuaqtauyyuq ihumayaamik taimaa ihuaqnighakkut parnaiyainiq kaivitaqtuq havauhiyuq.

Taapkua Ihuaqnighakkut Parnaiyautit “taimaaqpiayuittut”. Kihimi, aularaaqhutik aallannuqtaqhutiklu atuqtaq, aallannuqtauvaktut ilaita titiraangit ilaanilu nutaannguqpiqtauvaktuq ihumagiplugit iharianaqtut nuivalliyunit.



Hapkua utiqtaqtut havauhighat ilittuqhitiyauhimagut naunaitkutanit ilittuqhitiyauyut kinguani makpiqqanit.

Ihuaqnighakkut Parnaiyaiyut Havauhiq 1: Parnaihimalutit

Taapkua Katimayit ihumaliuqhimagumik taimaa nutaat Ihuaqnighakkut Parnaiyautit iharianaqhiyut amihuuplutiklu Katimayit ilihimattianngitait hughaungmangaata parnaiyautit, irinikhuklutik ilittuqhitiyaghariyut. Taimaa naunaiqhitalugit katimaqatigilugit ilihimattiaqtut Katimayit, SAO/CAO-nguyuuq, Kavamatkut Nunavunmi kivgaqtiit, unniqtuiyit, avugiiktunikluuniit hapkuninnga. Katimayut ikayuutauniaqtut Katimayinut ilihimattiarimik:


- Hughauyaaghait haamlatkut Ihuaqnighakkut Parnaiyautit.
- Qanuq Ihuaqnighakkut Parnaiyautit parnaiyaqtauvaktut (taapkuatut, titiraangit takupkaqtitaghailu iniriqhugit)
- Aallatqiingniit taapkua iniqtauyumayut, ihuaqnighakkut havauhighat, havaaghat/ iniqhimayut.
- Munaqtaghaita Miiyauyum, Katimayit, SAO/CAO-nguyum, haamlatkut havaktiit, ahiillu ilauyut hanayunik Ihuaqnighakkut Parnaiyautinik.

Ilihimattiarighutik taapkua Katimayit, tukliq havaaghauyuuq taimaa katitirilutik Ihuaqnighakkut Parnaiyautinut Havaqatigiingnik. Taamna Miiyauyuq Katimayit munaqtiulluangugamik haamlatkunni parnaiyainiqmik, Katimayit tamatkiumayutut – tikkuaqhimayuqluuniit Katimayit Katimayiralaat (taapkuatut Ihuaqnighakkut Parnaiyit Katimayiralaat) – hivuliqtiuvaktut.

Taamna SAO/CAO-nguyuuq ilaanilu atauhiq qaffiuyulluuniit ayuqnaqtunut unniqtuiyit ilauvangniaqtut Katimayiralaanunniqtuiyit titirariamiklu unipkaariyut ihumaliugaillu. Havaktitauyut katimaqatigiit, hivuliqtiyayuktut Havakvium atannguyaamik (taapkuatut Aulapkaariyuuq Maniliqiniqmut, Aulapkaariyuuq Parnaiyainiqmik Nunaniklu, Ulapqipkaariyut Aulapkaariyuuq, Tuhaqtitiyit Aulapkaariyuuq, qanuqlu), aullaqtitaulaqtut ilittuqhitiyughat kitunikiaq ihumaalutunik taimaaluuniit havaaghat inirahuaqlugit (taapkuatut HAHA-nik qauyihaiyut) naunaiqhitalugillu taapkua Ihuaqnighakkut Parnaiyit Katimayiralaangit.

Talvani angitqiyaniit nunallaarnit tahapkua ihuaqnighakkut parnaiyaiyut ayuqnatqiyauvaktunit, ikayuutauniaqtuq tikkuaqhiyaamik *ihuaqnighakkut parnaiyighamik* titiraqhimayaamik tamangnik havaangit taimaalu iniqhivalliyaamik havakvighainik.

IHUAQNIGHAKKUT PARNAIYIT HAVAQATIGIIT



Makititaugumik, taapkua Ihuaqnighakkut Parnaiyaiyut Katimayiralaat hivulliqaat havaaghait taimaittughaq angiqatigiiklutik havaughanik ikkuaqtuutighaq havaqatigiingnut havaaghanullu. Taapkuatut:

- Kina ihumaliuqniaqqa? Miiyauyuq Katimayiillu? Havaktitauyut katimaqatigiit ihuaqhainahuaqtut hunanikiaq unipkaaqtanik? Ilauyut inuit katimaviinit? Qanuqlu
- Qanuq ihumaliuqpangniaqqa? Amigaitqiyaugumik niruaqtittigumik Katimayinik? Angiqatigiikkumik Katimayiit? Nunallaarmiut niruaqtitaugumik? Qanuqlu
- Qanuq kitukiat ilauyut ilaupkaqtitauniaqqa? Aulahimaaqtumik ilaupkaqtitaulutik havauhrnut? Takupkaqtittilutik qakugunnuraangat havauhiqnit? Ilaulutik tautuutiplutik qaritauyakkuuqtunikluuniit apiqhuutikkut? Qanuqlu
- Qanuq taapkua Ihuaqnighakkut Parnaiyaiyut Katimayiit tuhaqtittivangniaqqaq ilauyunik – kialu naunaitkutaigut pinnaqhikpat?

Apiqhuutit hapkuatut ihumaliuqtauyughat havaarilihaaqhugu parnaiyaiyut.



PARNAIYAIYUT HAVAAGHAIT TITIQTAGHAIT

- ☐ Parnaiyaiyughanik havaqatigiighanik tikkuaqhiluhi.
- ☐ Maligaliqiyikkut iniqhiyumalutik hivuliqtuilutiklu.
- ☐ Tikkuqaqhilutik Ihuaqnighakkut Parnaiyighamik.
- ☐ Ihumagilugit taapkua katimaqatiginahuaqlugillu ayuqnaqtunut unniqtuiyit ikayuqtiqhat.
- ☐ Iniriiyaqlugu timiqutim hanauhia.
- ☐ Angiqhimalutik tamangnut timiqutim maliktaghainut havaaghanullu parnaiyautainik.

Ihuaqnighakkut Parnaiyaiyut Havauhiq 2: Ilittuqhitilugu Ihivriuqluguluuniit Ihumagiyatit, Havaaghatit, Ikpigiyaatillu

Naunaiqhitittiaqtinnatik taapkuninnga ihuaqnighakkut parnaiyaiyut, aghurnaqtuq ihivriutqigiamik tunngavigiyaita tamangnik havaaghatit tunngavigiyaghainik: haamlatkut ihumagiyait, havaaghait, ikpigiyaatillu. Ihumaliuttiaqnaqtuq hapkua katimaqatigiiktumik havaaghariyaamik ilaupkaqhugit Katimayiit, tikkuaqtauhimayut haamlatkut havaktiit, nunallaarmiullu kivgaqtiit. Qaffiyut havauhiit atuqtaulaqtut ihumaliugaqnik ihuaqhaivalliyaamik hapkununnga aghurnaqtunut uqauhirnut unipkaaqtayut ataagut taamna *Ingilrutit Ikayuutighat Parnaiyaiyut*.

Ihumagiyaqnut Uqauhiit

Una naittuq, qauhittiarnaqtuqlu uqauhiq ilittuqhitivaktuq qanuq nunallaarmiut niruaqtauhimayullu Katimayiit naahuriyut nunallaarmingnit tallimanit-10-nikluuniit ukiunit.

Nakuuyuq Ihumagiyaqnut Uqauhiq taimaittuq:

- Hivumuinnaq ihumayut.
- Hanatuyuq.
- Nannganaqtuq.
- Ilittuqhitivaktuq qanurittaaghaat iniqhittiaqtut.
- Ilitturinnaqtuq ayuqnaittuqlu tuhaqtittiyaamik.

Ihumagiyaqnut Uqauhiit iliqahiutiyunik hapkuninnga havauhittianik ikayuutauniaqtuq aullaqtittiyaamik havaqtittiyaamik niruaqtauhimayunik katimayinik, haamlatkunni havaktiit, nunallaarmiuniklu havaqatigiiktumik iniqhinahuarimik nunallaqtut.



Ilittuqhitiuyut (atuqtauyumik) Nunallaarnit Ihumagiyainut Uqauhiit

ICEPICK-kut Ihumagiyait Hivunighamut
Haamlangat Icepick-kut tunnganaqtuq nunallaaq ingilralukaaqhutik manighiuqhutik, halumayumik avatilik, nakuuyunik ulapqivilik ilitquhitsuviqaqhutik, kiuhilaaniklu inuliyiqilgit ikayuqtinik talvani tamangnik amirnaiqhimayut, inuuhiqattiaqtut, havaaghaqattiaqhutiklu iniqhittiarimik aliahuttiarimiklu.

Havaaghanut Uqauhiit

Aallanngatqiyaupluni nannganaqtumit Ihumagiyainut Uqauhiit, Havaaghanut Uqauhiit ilittuqhitiulluaqtuq haamlatkut havaaghainik. Ilittuqhitiuyuq huuq haamlatkut talvaniittut timiqtitut.

Havaghutik iniqhinahuaqhutik Havaaghanut Uqauhiqnik ihumagiplugu nunallaat aghuurnaqtut taimainmat, ingattauyut uqauhiit taapkua Ihumagiyatit Ikpigiyaatillu, atuqtaulluaqniaqmat tikkuaqhiyaamik inirumayarnik, havauhiqnik, piyumayaniklu – qauyihaiplutiklu havaaghat hivumuuttiarighainik.

Naittukkut, Havaaghanut Uqauhiit puiguqtailivagait Katimayit havaaghainik, havaghimaquiplugit iniqtaghainut, ilittuqhitiuplunilu qauyihaiyaamik inittiaqhimayanik.

Ilittuqhitiuyut (atuqtauyumik) Nunallaarnit Havaaghanut Uqauhiit

Haamlatkut Icepick-mi Havaaghait
Haamlatkunni Kavamatkut tuniqhihimainnaqtut nunallaarmiut inuuhiqattiaquplugit aullaqtittiplutik kayumiktunik ihuaqtuniklu haamlatkut aulapkaqtainik ikayuutiniklu ihuaqhivalliyavaktut nuivalliyunit ihariagiyanik, ihumagittiaqhugit ilitquhiit, ilaupkaiplugit inuit, havaktighaliuqhutiklu.

Ikpigiyanut Uqauhiit

Ikpigiyanut uqauhiit – ilaani ilitturiyauvaktut taimaa ikkuaqtuutitut – aularaaqpaktut, piqpagiplutik, ilitturinnaqhutiklu qitqanin ukpiruhuutait. Ikayuutaavaktut ilittuqhitiuplutik haamlatkut timiqutaita *ilitquhiinik* taimaa ilittuqhitiuplugit ikpigiyaavut aghuurutigiyavut. Qitqaninngaaqtut ikpingnautit/maliktaghat aularaaqnaqtughat; ilauyut ilingnut hivituyunik ihuaqnighakkut havauhighat tunngaviinut.

Iqalungni Uqauhiit Qitqaniittunik Ikpigiyanut

IKPIGIYAVUT

Kivgaqtuittiaqniq

Haamlatkut maligaliqiyit havaktiit pittiaqtughayut ihumagiplugit ikpigiyaavut havauhiillu titiraqhimayut talvani Maliktaghat Havauhiqattiarinimut Maligaghaliuqhimayut.

Inuuhiqattiarinik

Nakuuniqhakkut ikayurahuaqhutik taimaa pittiarahuaqhutik havauhiqattiarahuaqhutiklu.

Pittiaruhiit

Nakuuniqhakkut nunallaarnik maligaliqiyittiarahuaqhutik ilihagtittiplugit havaktiit ilihaiplutik hivuliqtiuplutiklu.

Nakuuniqhakkut

Nakuuniqhakkut hanahimmaarahuaqtut ihuaqhautighanik havaqatigiplugit nunallaarmiut.

Havaqatigiiktut

Nakuuniqhanik havakviqattiaqhutik parnaiyattiaqhimannikkut, havaqatigiingnikkut, tuhaqtittigiingnikkullu katimayivullu.

Hivuliqtiuninik

Maliguaruminaqlutik ahinut, taimaalu, hivuliqtiuluhi. Naahuriyaayutit ilittuqhitiyaamik hivuliqtiuninimik ihumagittiaqhugu Maliktaghat Havauhiqattiarinimut Maligaghaliuqhimayut.





IHMAGIYAIT, HAVAAGHAIT, IKPIGIYAINULLU HAVAAGHANUT TITIQTAGHAT

- ☐ Ihivriuqlugu Ihumagiyatit, Havaaghatit, Ikpigiyatillu titiraqpaalliqtinnaatik ihuaqnighakkut parnaiyautinik.
- ☐ Katimapkailugit nunallaarmiut tuhaqtittiplugit ihumagiyainik hivunighamut.
- ☐ Apirilutit: hapkua pitquyahimayut iniqtauhimavat nakuuyumik Ihumagiyanut Uqauhirnut?
- ☐ Havaaghanut Uqauhiliuqlutik tighuyumik haamlatkut havaaghainik qanuqlu hivumuuqpalliyaaghainik.
- ☐ Atuqlugit Ikpigiyanut Uqauhiit naunaiqhiyaamik timiqutit ilitquhianik taapkua haamlatkut piyumayainik.

Ihuaqnighakkut Parnaiyaiyut Havauhiq 3: Atuqtamingnik Qauyihailutik

Piyumayaita atuqtamingnik qauyihaiplutik taimaa ihivriuqhiyaamik qanurittaaghainik nunallaarnit talvanilu haamlatkut kuapuriissaanit. Naahurittiarnaqtunik ihumagiyaamik nunallaam haamlatkullu hakugingniinik ayuqhautailu, havaaghatit, amirnautit, maliguminaqtut, ingilraviillu ilitturinnaqhivaalliqaqtut qanuq aallannuqtiriyaamik nunallaam ihariagiyaanut nanngariyainullu.

Atuqtamingnik qauyihautit aullaqtitavaktut naunaiqhitinik katitiriplitik.

Naunaitkutaqattiaqlutik mighaagut avighimayut uqauhiillu aghurnaqtut nunallaarmiunut haamlatkullu kuapuriissaanut. Naunaitkutahiuqlutik ihariagiyaayut taapkununnga:

- Naunaiqhitit titiraqhimayaita haamlatkut havakviit nunallaarmiullu timiqutait.
- Inugiangniinut naunaitkut katitititayut taapkuninnga Naunaiqhitiviit Kanatami taapkualu Nunavunmi Kavamatkut havakviit.
- Taaksiiyautinut naunaitkut.
- Hanavallianiqmut tughirautit.
- Aulapkaqtitainut ilauyut naatjuhiit
- Nanminilgit havaangit.
- Haamlatkut maniliqiniqmut havauhiit.
- ... qanuqlu taimaa.

Ihuaqutauniarungnaqhiyuq katitiriyaamik naunaitkutanik nunallaarmiutat pitquhiinik talvuuna:

- Ilihaqtitauplutik nunallaarmiut katimaviinut.
- Qaritauyakkut taututigiighutiklu apiqhuplutik qauyihaiplutiklu.
- Atauhiutigiighutik katimaqatigiighutiklu apiqhuplutik.

Ilingnik apirilutit: nani naunaitkut ihariagiyaatka naniniaqqigit?

Tigumiaqhutik naunaitkutanik, hapkua kinguani aallatqiiktut qauyihautaulaqtut:

- Havakvingnik qauyihaiyut: kitut timiqutit, inuliyut nanminiuyullu, aulavat nunallaarnit, qanuq havaaghaqaqtat havaktiqaqqallu, qanurittunik ingilratjuhiqaqtat (taapkuatut, aklivaalliqtut mighivaallirumikluuniit, hanaqilukaaqpalliat hanaqihuiqpalliavalluuniit, qanuqlu), qanuqlu aulapkaiaat ihuaqhivaalliqaqqa ikayuqaalliriamik nunallaangat?
- Inugiangniinut qauyihautit: tajja qanuq inugiangniqaqqa, havaktiukaffuktut, pulaaqtillu nunallaarnit? Hapkua avugiiktut



aallanguqpalliavak? Hunavaluit humunngauvallianahugivigik?

- Nayugaqnik qauyihautit: atuqhugit nunaayat parnaiyautillu titiqqat, qanuq aktigiyunik nunat tajja atuqtauyut huuqlu, qanuq aktinia atuinarianikpa iharianaqqat, qanuqlu aallanguqtauyariaqqat nunallaarni kikkililiuqhimayut? Qanuq aktigiyunik nuna nunallaam kikklianit nanminiriyaat haamlatkut kuapuriissait qanuqlu aktigiyunik nanminiqaqtunut?
- Maniliqiniqmut qauyihautit: ihumagiplugit utuqqait naunaitkut at hivunighamilu atuqtauniarahugiyut, qauyihautit hapkua ikayuutauyut parnaiyainiqmut naahuriyaamiklu haamlatkut maniliqinikkut havaaghainik.
- Qauyihautit nunallaam manighiurutainut qanurininganiinik manighiurutighaniklu.
- Qauyihautit nunallaam pitquhiriyainik pivighanik, avatiliqiniqmut ihumaalutitut, hilalu aallanguqpalliyumi amirnautinullu.
- Qauyihautit inuuhiqattiarniqmut ihuilutunik taapkuatut havaaghaqhiurniq, niqighaillurniq, inugiangniit inutquaqpalliyut, ihuinaaqtut, huniqlukturniq, inuuhirnik quviahuutiniq, ahiniklu.
- Qanuq havauhighaliuqlutik mikitqiyait nunallaarnit ihariattiyunik inunngnullu ahiittunik ihariattiyunik.
- Qauyihautit nunallaarmiutat irinigitqiyainik taapkuatut ikluqpaghaliuqviit, ayuqnaitut ikayuutit, ikluqpaghat, aanniaqtailiniq, qayangnainniq, pitquhiit, ilitquhinullu nanminiit, qanuqlu.

Nunallaarnit atuqtaffingnit ihumaliurutauniaqtuq qanurittunik qauyihaiyaamik. Ilangi hapkua qauyihautit ahiittunik qauhmayaghaungmata ilihahimalutiklu, apiriyumaniqatit

ayunqaqtunut unniqtuiyit ayuittulluuniit ahinit havakvingnit kavamatkunnit ikayuqulugit.

Ihuaqhaiyaamik qauyihaiyut qanurininganiinik tuniqhihimayaayaamiklu iniqtaghainut, nakuuyuq parnaiyaayaamik hulilukaaqvighanik tuhaqvigiyaamik amihuuyut ilauyut qauyihailutiklu atauttikku. Taapkuatut, katimavighainik parnaiyailaaqtutit talvuuna ilauyut aviktuqhimalutik uqauhiqaqlutik havakvighaanut aallatqiingnik havaqatigiitkat katimaqatigiit, tamangnik katimaqatigiit aallatqiiktunik ilauyuqarlutik. Tikkuqaqtauhimayumi katinnaqhikpat, havaktitauhimayut katimaqatigiit katinnahuat ilittuqhitiyaamik ilihimaliqtaait unipkaariamiklu qanuriliutiniariaghainiklu hivunighami nunallaarnut.

Ihuaqnighakkut Havauhiqnut Ilittuqhitit

Aippaalu aghurnaqtuq qauyihautik unipkaaqaunngittuq qulaani taamnauyuq *ihuaqnighakkut havauhiqnut ilittuqhitit*, atuqtauvaktuq qauhittiarimik ilumiutanik hilataarniqmiullu ihumaliurutauvaktut haamlatkut kuapuriissaanut nunallaarnullu. Taimaitpat, apiqhuutit apiqhuqtaghat taapkuanguyut:

- Tamatkiumayumik, qanuriliuqpakpita nakuuyumik nunallaaqtut?
- Kitut haamlatkuni havakviuyut aulattiaqtumik iniqhivaktut irinigiyaainik?
- Kitut timiqutit nunallaarnit hakugiktumik ikayuqtiuvaktut nunallaarmi inuuhiqattiarniqmut?
- Tamatkiumayumik, qanuq haamlatkut hanaqittianngittut, qanuqlu ihuaqhiniyaqqa?
- Kitut haamlatkunni havakviit ayuqhautiqaqqat iniqhiyaamik irinigiyaainik?
- Kitut timiqutit nunallaarnit ayuqhaqpakpat, qanuqlu ikayuqtaunniyaqqat?
- Qanurittunik nakurutitqaqqita haamlatkut kuapuriissatut nunallaaqtullu?



- Kitut kinguvautigivagaqqut haamlatkut kuapuriissatut/nunallaaqtut?
- Kitut hilataanirmiut ingilrayut maliguminaqtullu nakurutauniaqqat nunallaarnut?
- Kitut hilataanirmiut ingilrayut maliguminaqtullu nakuunngittut nunallaarnut?

Kiutjutit apiqhuutinut taapkuatut qulaani ikayuutauniaqtut ilingnut HAHA-mik qauyihaiyaamik, titiraqhimayut naunaittiaqtumik ahini hapkunani titiqqanit.



ATUQTAUYUMIK QAUYIHAUTINUT INIQTAGHAT

- ❑ Ihivriuqlugit taja qanurilingayaaghait hunavaluit nunallaarni haamlatkullu kuapuriissaanit katitiqhutik naunaitkutanik.
- ❑ Aallatqiingnik qauyihautinik atuqlutik ilihimattiarimik naunaitkutatit katitiqhimayut. Qanuq ihumagiyauniaqqat taapkua qanurininganiit nunallaarnit havakviit, inugiangniit ingilraviit, nunat ihariagiyaait hailiyauhimaayullu, manighiurniqmut havaaghat, avatinut amirnautit, inuuhiqattiarniqmut ihumaaluutit, qanuqlu.
- ❑ Katimaqatigilugit ilauyut naunaitkutanik katitiriyunik qauyihaiyuniklu ihuaqhaivalliayaamik tuniqhihimayaayaamiklu.
- ❑ Qauyihaglugu nunallaam ihuaqnighakkut havauhirnut ilittuqhilit.

Ihuaqnighakkut Parnaiyaiyut Havauhiq 4: Titiraqlugit Inirumayatit, Ihuaqnighakkut Havauhighat, Havauhirniklu

Hivullit pingahuuyut havauhighat iniqtaugumik talvani ihuaqnighakkut parnaiyaiyut havauhiinit, hanahimaniaqtutit havakvingnit havakvighanik, naunaittiaqhimalugu Ihumagiyatit, Havaaghatit, Ikpingnautillu, katitiqhimalutit qauyihaqhimaplugillu naunaitkutat haamlatkut taja atuqtainik.

Ayurnavyaqtumik havaaghanik iniqhinnaqhiyuq ilittuqhariamik hivituyumi iniqtauyumayut, atuqhugit ihuaqnighakkut havauhighat, hiviiktullu havaaghat hivumuuqtittiyut haamlatkut kuapuriissaanit nunallaarniklu hivunighamut tautuktauyutut.

Hivituyumi iniqtauyumayut

Hivituyumi-iniqtauyumayut qauhittiarnaqtuq uqauhiq qanuq iniqhiyumayaqnik, maliguaqhuni Ihumagiyarnut, Havaaghanut, Ikpigiyannullu qanuqlu ilitturihimaliqtatit atuqtauyumik qauyihaiyunit. Iniqtauyumayut tallimanik ukiunik atuqtauvaktut aajikkutaanik taapkua Ihuaqnighakkut Parnaiyautinik.

Taapkua Ihuaqnighakkut Parnaiyautit tallimanik 7-nikluuniit ukiunik hivituyumi iniqtauyughanik iniqtaghaqaqtut. Iniqtauyughanut naamayut taimaa ihumagilluariamik inirumayarnik aghuurnaqtut nunallaarnut ukiunit tallimanit atuqtughanit. Avatqukupata 7-nguyut iniqtauyughat, ahikkuuqpangniaqtutit ihuilutiqarlutik, iniqtailiplugit iniqtauyughat naammaktumik.

Taitai, iniqtauyumayut qauhittiarnaqtut, angiplotik, hivituyuuplotiklu pitquhiigut. Taapkuatut:



Icepick-kut ihuaqnighakkut havauhighait taimaittut:

- Titiraliqittiriamik haamlatkunnit.
- Aulattiaqtughanik ikluqpaghaliuqlutik amiriplugu avatiit.
- Ikayurahuaqlugit hakugiktumik, aulattiaqtumik manighiurutinik.
- Nakuuniqhanik inuliyiyikkut ikayuutihagaqlutik
- Munarilugit quviahuutigilugillu Inuit ilitquhiit pitquhiillu.

Ihuaqnighakkut Havauhiit

Ihuaqnighakkut havauhiit ilittuqhivaktut qanuq inirumayaagharnik iniqtaghanik kihimi ilitturittiarnaittut havautigiyaamik qauyihariamikluuniit.

Utiqhutik Icepick-kut ihuaqnighakkut inirumayainut, hapkua ilangi ikayuutauyut iniqhiyaamik:

Iniqtauyumayuq: Titiraliqittiriamik haamlatkunnit.

Ihuaqnighakkut havauhiit:

- Ihumagilluaqlugu angmaumaniq, ilitturittiarniq, kivgaqtuittiarniqlu havaaghaptngnit tamaat.
- Ayuqnaiqpaalliqlugu inungnut atuqtitauyaamik Haamlatkut naunaitkutainik ikayuutainiklu.
- Havattiaqlutik ikayuqtitut munarilugit Haamlatkut maniutait.
- Atuqtittighaarahaqlugit hivituyumi aulattiaqtut Haamlatkut ikayuutait.
- Parnaiyattiaqhimagumik parnaiyainiqmut havakvighaqaqlutik Nunallaat hivumuurutighait.

Hivikittumi iniqtauyughat havaaghat

Iharianaqtuq huli havaannguqtittiyaamik ihuaqnighakkut havauhighait iniqtaulaaqtunut havaaghanut atauhiqmi-malrungniluuniit ukiunit. Aghuurnaqtutik, taapkuanguyut:

- Iniqhimayut qauyihagaqtaulaaqhutiklu.
- Tuniyauvaktut kitumutkiaq inungmut havaariyaghaat.
- Iniqvighaanik upluunik tuniyauvaghutik.

Iniqtaghaungmata hivikittumi, himmiqtaulaaqtut ahinik havauhikkut taamna Ihuaqnighakkut Parnaiyautik ihivriuqtaugaangat. Iniqhimagamik qauyihagaqtaulaarumiklu ilihimapkaivaktuq iniqhigaangat.

Atauhiq Icepick-kut ihuaqnighakkut havauhighalgit nakuuniqhakkut haamlatkunni titiraliqiyaaamik taimaatut *Ayuqnaiqpaalliqlugu nunallaarmiunut atuqtitauyaamik Haamlatkut naunaitkutainik ikayuutainiklu.*

Naunaittut, qauyihaiyut havauhiit taimailaaqtut:

Ihuaqnighakkut havauhiq: Ayuqnaiqpaalliqlugu nunallaarmiunut atuqtitauyaamik Haamlatkut naunaitkutainik ikayuutainiklu.

Havauhiit:

Iniriiqhilutik atauhiqmik tautuutiplutik katimavighanik taimaaluuniit qaritauyakkut inungnik naunaiqhivighaanik katimavighanik tatqiqhiutit tamaat ilittuqhitiyaamik nunallaarmiut Katimayitit havaanginnik kiuhiyaamiklu apiqhuutinik.

Hivuliqti: Tuhaqtittiyit

Aulapkaiyiryuangat

Upluq iniqvighaat: September 2022

Titiraqlugit katimatjutaita Katimayitit Haamlatkut qaritauyakkuurutainit malruk uplut naatinatit aniguqtitauvianit.

Hivuliqti: Qaritauyakkuurutinit titiraqti

Upluq iniqvighaat: Aulahimmaaqut



Atauhiqmik hivayaqtaghamik nappaanik tunihilutik nunallaarmiunut hivayaqtaghaat atuqtaghaallu Haamlatkut ikayutainik atuqtitauyaamik 6-mit uplaami 10-mut unnuktumi, Monday-mit Saturday-mut.

Hivuliqti: Haamlatkut titiraqtia

Upluq iniqvighaat: January 2023



INIQTAYUMAYUT, IHUAQNIGHAKKUT HAVAUHIIT, HAVAAGHALLU

- ☐ Titiraqlugit hivituyumi atuqtauyughat, angiyut iniqtauyughat Nunallaarnit, ihumagiplugit ihumaaluutit ihumaliuqhimayullu ilitturiyauhimagayut atuqtauyumi qauyihautinit.
- ☐ Ihuaqnighakkut havauhighaliuqlugit tamangnut iniqtauyughanut. Ihuaqnighakkut havauhighat kiutjutauyut apiqhuutinut “qanuq havauhiqarniaqqita iniqhiyaamik iniqtauyughanik?”
- ☐ Tamangnut ihuaqnighakkut havauhighanut, ilittuqhaqlugit kitukiak, qauyihaqhimayunik havaaghat iniqhiyaamik.

Ihuaqnighakkut Parnaiyaiyut Havauhiq 5: Titiraqlugit Atuqtittilugulu Ihuaqnighakkut Parnaiyautit

Tajjamut, titiraqhimaliqtutit katitiqhimaplutillu ihumaliuttiaqhimayunik ihumagiplugit qauyihaqtauhimagayut. Kihimi katitauhimaittut huli atauhiqmut, parnaiyattiaqhimayug titiraq takupkaqtitalaqaqtuq ilaayunut. Ilaita atauttinnuraangat, tamangnik inuit taututtialiqpaktut qanuq iniqniaqhimayaagharnik ihumagiyatit.

Parnaiyaiyaamik Parnaiyautinik havaaghariyauvaktuq atauhiqmit inungmit titirauhiqattiaqtumik havaqatauvaktumiklu titiraqtuiyunik. Atauhiqmik titiraqtuqiamik ikayuutauyug taimaa titiraq tamaat atauhiqmik nipiqtiamik.

Hivulliq iniqtauyughaq parnaiyautik ihivriuttiaqtaghaat Katimayiit, Katimayiralaat, SAO/CAO-nguyug, tikkuaqtauhimagayut havaktit, tikkuaqtauhimagayullu ilaayut taimaa naatkutigiittiamik ilittuqhiyaamiklu qanurininganiinik havauhiit. Amigaittunik iniqtauyughanik parnaiyautighanik ihariaginiaqtut taamna kingulliqpaaq, angiqtauhimagayug iniqtautinnagu.

Ilittuqhiitiyut Naunaitkutat taapkununga Ihuaqnighakkut Parnaiyautit

Atauhiqmik “ihuaqnighanik havauhiittuq” tutqighaiyaamik Haamlatkut Ihuaqnighakkut Parnaiyautainik. Kihimi, amihuuyut Ihuaqnighakkut Parnaiyautit Nunavunmi iliqahiutivaktut ilainnaanik tamainnikluuniit hapkuninnga atuqtaghainik.

1. Uqauhiqnik Miiyamiit Katimayinillu
 - Hughauyug taamna Ihuaqnighakkut Parnaiyautit
 - Naahurittiaqnaqtunik uqauhiqnik hivunighamut.
 - Quyagilugit ikayuqtiit ilaayullu.
2. Ihuaqnighakkut Havauhiqnut Tunngaviit.
 - Ihumagiyatit, Havaaghaq, Ikpinqnaqtullu.
3. Tajja Ihuaqnighakkut Havauhinut Qanurininganiit
 - Ihuaqnighakkut Parnaiyautit titiraqtut havauhiit.
 - Naunaitkutat tajja ihuaqnighakkut havauhirnut ilittuqhiitiinut.
 - Atannguyanit naunaitkutanik haamlatkut maningnut qanurininganianut.



4. Ihuaqnighakkut Havauhirnut Irinigiyaayut (Iniqtauyumayut)
 - Titiraqtauyut haamlatkunnit tallimanit-7-nut ukiunik hivituyunik ihuaqnighakkut havauhirnut iniqtauyumayut
 - Naittumik (atauhiinnaqmik titiraqviqarlutik) ilittuqhitinik tamangnut iniqtauyumayunik.
5. Ihuaqnighakkut Havauhighat Havaaghallu
 - Ihuaqnighakkut havauhighat ilitturiyauhmayut iniqhiyaamik tamangnik ihuaqnighakkut havauhirnut iniqtauyughat.
 - Iniqhimayut qauyihaqtaulaaqtullu havaaghat atayunik tamangnut ihuaqnighakkut havauhighanut, atauttikkullu tikkuaqhilutik havaktighanik iniqvighainiklu upluanik.
6. Munaqhiyut Qauyihaiyullu
 - Qanuq aulattiarninga taamna Ihuaqnighakkut Parnaiyautik munaqtauvangniaq qauyihaqtaulunilu.
 - Qanuq iniqpalliyut tuhaqtitauvangniat inungnut.

7. Uiguat (ilittuqhitikaffuit)
 - Haamlatkunni havakvingnut naunaitkutut
 - Naunaitkutut qauyihaqtunit qanurininganiit (taapkuatut HAAA-nik qauyihautinut naunaitkutut).
 - Ilihimalluaqtaghat talvannat Ihuaqnighakkut Parnaiyautinit naunaittiaqhimayumik.
 - Hivayautinut naunaitkutait Miiyaayum, Katimayiit, havaktilluallu.

Titirauhiit Katitiriamik Ilihimalluaqtaghanik Ihuaqnighakkut Havauhighanut

Iniqhimalirumik inirumayatit, ihuaqnighakkut havauhiit, havaaghat, qauyihautillu aulattiarnianut titiraqhimaplugillu talvani Ihuaqnighakkut Parnaiyautinit, ikayuutauvaktuq naunaittiariamik naunaitkutanit takupkaqtitauhimayutut ataani. Naunaitkutut iliqahiutiyaulaaqut Uiguatut talvunga Ihuaqnighakkut Parnaiyautinut titiraqtauluniluuniit avaliittumik titiraqtitut atuqtaulaaqhuni taiguaqtaghatut inuit naunaiqhitiyauplutik katimaviinit.



	Iniqtauyumayut	Ihuaqnighakkut Havauhiit	U1	U2	U3	U4	U5	Qauyihautit inittiaqhimayunik
Munariyaghait	Iniqtauyumayuq 1 Amigaitqiyaulaaqtut iniqtauyumayut ilauyut tamangnut munariyaghanik.	Ihuaqnighakkut Havauhiq A Amigaitqiyaulaaqtut ihuaqnighakkut havauhighinik tamangnut iniqtauyumayumut	Havaaghaq 1					Havauhittiamik qauyihautighaqh- iuqtughat tamangnut ihuaqnighakkut havaaghanut.
			Havaaghaq 2					
			Havaaghaq 3	Havaaghat hivitulaaqtut atahiqmik amihunikluuniit ukiunik				
		Ihuaqnighakkut Havauhiq B						
	Iniqtauyumayuq 2 Amigaitqiyaulaaqtut iniqtauyumayut ilauyut tamangnut munariyaghanik.	Ihuaqnighakkut Havauhiq C	Amihut havaaghat ilaulaaqtut tamangnut ihuaqnighakkut havauhiqnut. Ilangi havaaghat aulahimmaalaaqtut					

	Iniqtauyumayut	Ihuaqnighakkut Havauhiit	U1	U2	U3	U4	U5	Qauyihautit inittiaqhimayunik		
Havaktighaliqiyit	Titiraqtittianik aulapkaiqarlutik haamlatkut aulapkaqtitainut ikayuutainullu	Ihivriuglugit nutaannguqtiqlugulu Havaqtiqhaliginiqmut Parnauyautit		Titiratqiklugu havaaghanut naunaitkutut					Havaaghanut naunaitkutut amihunut havaaghanut nutaannguqtiqhimayut	
		Havaktighaqhiuglutik nutaamik SAO/CAO-mik titiraqtittilugit katitpaalliniqmut parnaiyautinik.	Naunaiqhitalutik SAO/CAO-mut havaaghanik						Nutaamik SAO/CAO-nguyuuq havaktiqaliktut	
		Titiraqtittianik aulapkaiqarlutik haamlatkut aulapkaqtitainut ikayuutainullu			Tughiraqlutik naunaitkutanik haamlatkut akiliqtuivagainut ihivriughititnik		Ihumagilugit aallanngulaaqtut			Naunaitkutut tuniyauhimaliqtut haamlatkut akiliqtuivagainik ihivriughititit
					Ihumagitqiklugit ihumaliurutauyut ikayuutauniaqtut havaktighaqhiuriamik pihimanahuaqhugillu havaktiit		Havaktiit takupkaiviinik ilaulutik angayughiit ilihavqianit			Amigaiqpalliyut uuktuqtut havaaghanut havaktittiyullu havaaghaqhiuqtunik



Atuqtittivalliyut Parnaiyautinik

Taamna Ihuaqnighakkut Parnaiyautik aniguqtitaukpat Katimayinit, havaaghaq atuqtittiyaamik aullaqtiqpaqtuq. Qaffiyut ihumagiyaghat hapkunani.

Havaktilluat ilaayut titiraqtunit Ihuaqnighakkut Parnaiyautinik aghuurnaqtunik aulahimmaqtunik havaaghaqaqtut atuqtittivallianiqtumik. Hapkua havaaghat naunaiqhitiyaayut kinguani naunaitkutanit.

IHUAQNIGHAKKUT PARNAIYAUTINIK ATUQTITTIVALLIAYUT HAVAAGHAIT	
Miiyaayuq Katimayiillu	<ul style="list-style-type: none"> • Munarilugit tuhaqtittilugillu iniqtauvalliyut. • Tuhaqtittilugit iniqtauvalliyut inungnut ilaayunullu. • Quviahuutigilugu iniqhittiarniq.
SAO/CAO	<ul style="list-style-type: none"> • Titiraqpaqtut havaaghanut parnaiyautinik atuqtittivalliyaamik ihuaqnighakkut havauhghanik havaaghaniklu ilittuqhitiyimayut talvani Ihuaqnighakkut Parnaiyautinit. • Havaaghanik aittuqhivaktuq havaktinut. • Naunaiqhitivaktuq Katimayinut qanurininganiinut. • Aallannguqtiriquivaktut naunaiqhitivaghutiklu Ihuaqnighakkut Parnaiyautinut, ihariagiyaukpat.
Havaktiit	<ul style="list-style-type: none"> • Havaaghaita inirahuaqlugit. • SAO/CAO-lu qauhitihimalugit ihariagiyauyunik aallannguqtaghanik nutaannguqtiqtaghaniklu talvani Ihuaqnighakkut Parnaiyautinit.
Katimayiralaat / Havaktitauhimayut Katimayiit	<ul style="list-style-type: none"> • Makititaulaqtut ikkuaqtighat atuqtittivalliyaamik kitunikiaq iniqtauyumayunit ihuaqnighakkullu havauhiqnit, ihumagiylugu havaaghaq havakvighaqlu.
Inuit / Ilaayut	<ul style="list-style-type: none"> • Naunaiqhimaluhi. • Ihumangnik tuhaqtittiluhi Katimayinut. • Quviahuutigilugit aulattiaqtut.

Ahiagullu, ilangi titiraat talvani Ihuaqnighakkut Parnaiyautinik atuqtitaulaqtut hanaplutik naunaittaqhimayunik, kitunuinnaq-titiraqhimayunik parnaiyautinik taapkua, taiguaqhimayatit hivuani, ittut ataagut taamna “qutangnaitjutit” talvanngat Ihuaqnighakkut Parnaiyautinit.

Atuqtaulluaqpaqtut ilittuqhitiyuut hapkuninnga kitunuinnaq-titiraqhimayut parnaiyautit taapkuanguyut:

- Maniliqiniqmut Parnaiyautit
- Havaktighaliqiniqmut Parnaiyautit
- Angiyunut Nanminiqtut Parnaiyautit
- Nanminiqtut Munaqtit Parnaiyautit
- Nunallaarnit Nunanik Atuqtittiyut Parnaiyautit
- Irininaqtunut Kiuhiyut Parnaiyautit
- Ulapqipkaiyut Parnaiyautit
- Qulliqtuutinut Parnaiyautit
- ... ahiillu.



Tamangnik parnaiyautit atauttikkuuqtughat inirumayainut ihuaqnighakkullu havauhighanut titiraqhimayut talvani Ihuaqnighakkut Parnaiyautinit.

Tuhaqtittiyut Parnaiyautinik

Inuit tamangnik ikpiguhuutilgit Ihuaqnighakkut Parnaiyautinit – Katimayit, haamlatkut havaktiit, ahiniqmiullu ilauyut – ilihimattiaqtughat qanuq ikpiguhuutiqarniat qanuriliuriaghainiklu ikayuriamik aulattiarniit. Naittukkut, taamna Ihuaqnighakkut Parnaiyautik *tuhaqtitauyughaq*.

Ihuaqnighakkut Parnaiyautit ilaupkailaaqtuq ilanganik – tamangnikluuniit – hapkuninnga havauhighanik:

- Hailiyauhimplugu taamna Ihuaqnighakkut Parnaiyautit ayuqnaittumik ihuaqtukkullu ayuqnaitpat (taapkuatut tuniqhaiplugit aajjikkutaliuqhimayut iklumitanut, takupkaiplugit Haamlatkut qaritauyakkuurutainit, takupqaqtittiquplugillu ilauyut timiqutait atatarutainut Parnaiyautinut inmingnik qaritauyakkuurutainit)
- Niruaqtauhimayut havaktiit haamlatkullu havaktiita takupkaivakkumik Parnaiyautinik katimayunit, PowerPoint-kut titiraqhimayunik takupkailutikluuniit, kiuhilutik apiqhuutinik, tuniqhailutiklu taiguaqtaghanik ilaayunut Parnaiyautinik naunaitkutanikluuniit Parnaiyautinit ilihimalluaqtaghanut.
- Quviahuutigiplugu aulattiaqhimayut iniqtauhimayullu havaaghat ilittuqhitiyimayut Parnaiyautinit tuhaqtittiyaghanik haamlatkut qaritauyakkuurutainit tuhaayaghanikluuniit aniguqtittiplutik tuhaqtitiyikkut.
- Ilittuqhitiqattaqhutik Katimayinik Katimayiralaaniklu katimagaangamik iniqtauvalliyunit Parnaiyautinit.

Tuhaqtitauyughat mighaagut Ihuaqnighakkut Parnaiyautit qauhittiarnaqtumik

parnaiyattiaqhimalutik, ihumaliuttiarnaqtuq titirariamik taapkuninnga *Ihuaqnighakkut Parnaiyautinut Tuhaqtittiniqmut Havauhiit*.



TITIRAQTUT ATUQTITTIYULLU HAVAAGHAIT

- ❑ Aittuqhilugu havaaghaq titirattiyuktumut inungmut titirahiqattiaqtumik.
- ❑ Ihivriuqlugit ilittuqhitiyut Ihuaqnighakkut Parnaiyautinik titiraqhimayut ahinit nunallaarnit taimaa aghurnaqtut unipkaaqtughat kihingguqtailiyaamik.
- ❑ Katimayit, Katimayiralaat, SAO/ CAO-nguyuuq, tikkuaqtauhimayut havaktiit, tikkuaqtauhimayullu ilauyut ihivriuqhivaktut iniqtauyughanik Ihuaqnighakkut Parnaiyautinik iniqhiiplugu, angiqtauhimaliqqallu.
- ❑ Katitiqlugit ihumagilluaqtatit Parnaiyautinit naunaitkutatut ayuqnaiyuriamik ilaayunut ilihimayaamik atatarutainik inirumayarnut, ihuaqnighakkut havauhighanut, havaaghanut, qauyihautinullu aulattiarniqmut.
- ❑ Havauhiqattiaqtumik, aulahimmaqtumiklu havauhiqaqlutik atuqtittivallianiqmut

Ihuaqnighakkut Parnaiyautit Havauhiq 6: Munarilugit Qauyihaglugillu Qanurininganiit

Taamna Ihuaqnighakkut Parnaiyautik nutaannguqpalliyuuq titiraatik.



Qitqamiutat ikpiguhuutit iniqtauyumayullu aulahimmaaqhutik, ihuaqnighakkut havauhiit havaaghallu munaqtauvaktughat ihuaqhaqtaulutiklu utuqqannguqtailiplugit ihuaqtauyaamiklu.

Kitut Ihivriuqtauyughat Qauyihaqtauyughallu?

Ayuqnaittumik maliktaghatut, ihivriuqtaghariyatit havaaghatit qakugunnuraangat. Ihivriuqlugit taapkua havauhitit atuqtittivallianiqmut parnaiyautinit iniqtauvalliaaamik havakvighat ihumagiplugu ikayuutauyaaghailu iniqhiyaamik inirumayarnik piyumayarniklu. Ikayuutaunngitkumik, ihivriutqiklugit havaaghat/qauyihautighat titiraqhimayut Parnaiyautinit ihumaliurutigilugu taimaa ahiagut havauhikkut iniqhittiarutauniarumi.

Havaaghanut parnaiyautit atauttikkuurumi inirumayarnut piyumayarnullu, kihimi iniqhittiyuitkuvit huli, ihivriutqingniarungnaqhiyat inirumayaratit piyumayatillu. Ilaani, ihuilutaunngittuq qanuq talvunngariamik, kihimi qanuriliuqhutik ihuaqtumut tikittaamik. Apirilutik taimaa iniqtauyumayut ihuaqnighakkullu havauhighat titiratqiktauyariaghait.

Qakugunnuraangat qauyihaqtughavit?

Havauhittianguyuuq ukiuq tamaat qauyihaiyaamik Ihuaqnighakkut Parnaiyautinik. Ukiuq tamaat ihuaqnighakkut parnaiyaiplutik havakvighatqiyuuq ihivriuqhiyaamik taamnainnaunngittumik qanurininganiinik ihuaqnighakkut havauhighat havaaghallu talvani Ihuaqnighakkut Parnaiyautinit, kihimi tamangnik parnaiyautit qutangnaitjutiniittut. Hughayut iniqtauyughallu tamangnik parnaiyautinit ihivriuqtauyughat, ilagiingniillu unipkaaqtulutik. Ikayuutauniaqtuq Katimayinut ilihimattiariamik parnaiyainiqmut ayuqhautiqariaghait, ihumaliuriamiklu ahiagut parnaiyaqtariaghainik

iniqtauyumayunut haamlatkut Ihuaqnighakkut Parnaiyautinit.

Ihuaqtauniaqtuqlu ihivriuqhiyakkumik ihumagilluaqtainik Ihuaqnighakkut Parnaiyautinit hitamaiqlutik ukiumi – taapkuatut, maniliqiniqmut parnaiyainiqmut havauhiit – ingattauyuq aallannuqtarumik ikpingnautauplutik hivikittunnuami.

Ihuaqtauniarungnaqhiyuqlu ihivriuqhiyakkumik havauhiqnik ilanganik amigaitqiyaanik hitamaiqtuqtut ukiumi, ihumagiplugit hilataanit atuqtauyut ikpingnautauyut ikayuutinut, hulilukaqtanillu taapkuatut niruaqtittiyunit hivuliqtiniklu himmiqtuigumik. Kihimi, munariinnarahaqtaulugit tamaat. Qauyihavallaaqpakkumik munaqtaghaqapallaaqpaktut ihuilutaulaaqhuni inungnut havaktunut.

SAO/CAO-nguyuuq, ikayuqtaupluni havaktiinit, munaqtiuyughaq taimaa Katimayit naunaiqhitihimayaamik naunaitkutanik ihariagiyainik ihivriuqhiyaamik ihivriuqtaghanik.

Kina qauyihaiyughaq?

Nakuutqiyayuuq pingahuninngaqtuqarumi ilaunngittunik kitumutkiaq huliyaghanut, havaaghanut, ikayuutinulluuniit munaqtauyut qauyihaiyaamik havauhiinik. Nutqangayumik munaqtiqarumik ilumuqtumik “nutaaniklu iyyiqatqumik” ihuaqtukkut uqautjiniarungnaqhiyumik taimaalu/uniit ikayuqlutiklu. Inungnik ilaupkainiarungnaqhiyutit havaqatauyunik havaaghanut, havaagham tamatkiumania aulpaqtitauvaktuq atuqhugit ikayuutaita innum ilaunngittumik havaaghamut. Una inuk haamlatkut havakvianik havaktiuniarungnaqhiyuq havaktighaqhiuqlutikuunit hilataanit haamlatkut (taapkuatut unniqtuiyit, ahinik inungmik ahinit kavamatkunnit, ihumagiyaattiaqtumikluuniit nunallaarmiunik).



Ihuaqnighakkut Parnaiyaiyut Havauhiq 7: Ihumaliuqlutik Titiratqigiamik Nutaannguqtiqluguluuniit Parnaiyautit.

Uqaqhimayutut, Ihuaqnighakkut Parnaiyautit “atuqvigahayuktut” taimaa tallimanik ukiunik. Hunavaluit aallanngulaaqtut taimaa hivituyumi, talvuuna ihumannaqtuq taimaa ihuaqhaiyariaqaqniat atuqvighaat taimaarumik. Ayuqnaittuq – taimaaluuniit piyaulaqtuq – ilangi iniqtauyumayut ihuaqnighakkullu havauhigat ilitturihimayait ihuaqutauniaqtut. Taimaitpat, hanaqitqingnaittut aullaqtiqvianit. Iniriiqhimayumik tunngaviqarniaqtutit hanahimmaaqvighat kinguanik Ihuaqnighakkut Parnaiyautit.

Kihimi, ilangi titiraqhimayut hunanut talvani Ihuaqnighakkut Parnaiyautinit naammannaqtutut itpat, aghuurnaqtuq aullaqtitqigiamik havauhiit parnaiyaiyiqmut havaaghanik inittiaqhimayunik hivuanit.

Titiraqhimayutut talvani Ihuaqnighakkut Parnaiyaiyiqmut Havauhiit 1, 2, taamnal 3: parnaiyailutik nutaannguqtiriamik Parnaiyautit; pulaatqiklugu Ihumagiyarnut, Havaagharnut, Ikipiyayunullu uqauhiit; atuqtauyuniklu qauyihaittiaqlutik. Upinngaqhiqnaqtuq qanuq hunavaluit aallannguqaktut – qaffiuyuniklu ihumaqhuliugat tughirautayut hivunighat qaummaqaalliriamik!

Ingilrutit Ikayuutighat Parnaiyaiyaamik

Amihuuyunik ukiunik, ihuaqnighakkut parnaiyaiyiq ihumagiyavaktuq iharianaqtutut havauhiqtut timiqutinut aallatqiingnik. Talvuuna, upinngaqhiqnaittughaq taimaa amihuuyut ingilrutit havauhiillu hanayauhmayut aularaaqtillugit ikayuutighat parnaiyaiyiqmut. Hama ilangi qaffiuyut aturumanaqtatit.

Ihumaqhuliuqtut

Ihumaqhuliuriamik havauhiuyuq taimaa tamangnik ihumaqhuliuqtauyut tuhaqtauyaamik ihumagiyauyaamiklu. Ihumaqhuliuriamik katimayut hivuliqtiqaqpaktut ilihaqhimayumik uqaqtimik atuqpaktumik qakuqtamik titiraqvingmik, titirauyaqvingnit makpiqtaqtut, angiyunikluuniit titiraaghanik nivinngaqhimayut ikluaqmi titiraqvigahanik ihumaqhuliugaqnik. Ilauyut tunihitaaraangata ihumaqhuliugainik, taamna katimapkaiyuq ikkuaqtuqpagaik katimayut havauhikkut aviktuqhugit irininaqtullu ihumaliuqhugit. Irininaqtunut ihumaliukkat tunngavinnguqaktut inirumayainut ihuaqnighakkullu havauhirnut aullaqtiqviiyut ihuaqnighakkut parnaiyaiyiqmut.

Katimapkaittiaqaktut taimaa amirnaittumi aghuurnaqtumilu havakviqaqhutik, ihuilutaittumik, talvani tamangnik ilauyut havaktitauyaamik ikayuqhutik. Ihumaqhuliuriamik hanauyaqtutut hanatuyutullu ihumaqhuliurnaqtuq, atautikkullu ikayuqhugit ilauyut katitpalliayaamik inirumayaat ihumagiplugu.

Ihumaliugaqnut Naunaitkutat

Ihumaliugaqnut naunaitkutut havakvingnit ingilrutauyuq taimaa katimayunut ilauyut aallatqiingnik amigaittuniklu ihumaqhuliuriamik aviktuqlugillu pitquhiinut avvaqnut. Una ingilrutik ihumaqhuliuriamik hivumuqtittivaktuq naunaiqhitiplugit aviktuqhugit. Havaqatigiit ihumagittiaqtaghait avighimayut ilagiikkumik piyumayainullu iniqtaghainut. Ilitturittiaqnaqtut qanuq aturiamik ihumaliugaqnut naunaitkutat talvaniittut *Uiguuq 1-mi*.

Avatinik Ihivriuhiyut

Avatinik Ihivriuhiyut aulahimmaaqtumik munaqhivaktut ingilratjuhiqnik atuqtauyuniklu timiqutim iluani hilataanilu avatiit aghuurnaqtut aulattiriamik. Avatinik ihivriuhiyut



atauttikkuuyuktut taapkuulu Haha-nut qauyihautinik (titiraqhimayut ataani).

Havakvium Iluani Qauyihautit

ikayuutauyut naatittiyaamik timiqutivit tatta aulapkaiyait havaaghaillu ikayuutighatIT ihumaliuttiariamik piyumayarnik qanurittuniklu ikayuutiqariamik tatta kitunullu ikayuutauvat. Kinauvat ilauyut? Hunanik ihariattivat? Haamlatkut ikayuttiaqhimavait hivuanit? Taimaitpat, qanuq hanavigihimmaaqniaqqat? Taimainngitpat, qanuq ihuaqhaivaalliqliaqqat? Qanuq ihumayut?

Havakvium Hilataanit Qauyihautit

ikayuutauyut ilittuqhariamik ilauyunik. Hunat aghurnaqqat tamangnut ilauyunut? Haamlatkut ikayuqtiuvak ihariagiyainut? Qanuq ikayuqhimavakpat piniaqturihimayainik ikayuutigut? Kitut kavamatkut havaaghaigut maliktughauyugut? Qanuq ikayuqpangniaqqigut niuviqtit ihariagiyainut avatqutailiplugit manikkut, maligaliqiyit malighugit, kavamatkullu ahikkuuqtailiplugit.

Avatiliqiniqmut Ihivriuhuyut Titiraaghait iliqahiutihimayut *Uiguaq 2-mi*.

Haha-nut Qauyihautit

Ahiagullu ingilrutiuyut ihariagiyauyut atuqtittiyaamik Ihuaqnighakkut Parnaiyautinik taamnauyut Haha-nut qauyihautit. Haha-nut qauyihautinit, havakvium iluani hilataanilu qauyihavaktut tautughugit timiqutivit **Hakugingniit, Ayuqhautait, Havaaghat Amirnautilu:**

- Hakugingniit nakuuyut pitquhiuyut nunallaarnit tatta ikayuutauyut Havaaghainik iniqhiyaamik.
- Ayuqhautit taapkuanguyut haamlatkut ihuaqhaqtaghariyait Havaaghaita iniriamik.

- Havaaghat naahuriyauyut ingilratjuhiit hulilukaaqviillu nunallaarnit nakuruttiqtauvighaat hivunighami iniqhiyaamik Havaaghainik.
- Amirnautilu naahuriyauyut ingilratjuhiit hulilukaaqviillu amirnaqhilaagtut nunallaarnit iniqhiyaamik Havaaghainik.

Hakugingniit Ayuqhautillu *ilumiutauyut* nunallaarnit. Havaaghat Amirnautilu *hilataaniittut* nunallaarnit.

Naunaitkut qanuq Haha-nik ihivriuhuyuami talvaniittuq *Uiguaq 3-mi*.

Irininaqtunik Parnaiyaiyut

Ilvit havaqatitillu ihumaqhuliuqtatit aviktuqtaghatit aghurnaqqiigut, hivituniagut, atuqpauhiillu iniqtauyumayunut. Atuppauhiit Aviktuiniqmik Pitquyahimayunik havauhiulluakpaktuq ilauyunut ikayuutauyut ihumaliuqtaghanik angiqhiyaamik aghurnatqiyauyut piyumayainik iniqhiyaamik. Aviktuqhugit irininaqtukkut atuqhutik kitunikiaq uqauhullanik (taapkuatut “maliguattiatqiyauyut Ihumagiyaptingnut Havaaghaptingnullu”, “akikitqiyat”, “inuuhiqattiarniqmik hivumuuqtittiyut”, qanuqlu) taimaa inuit tamaita tautugumaaqtait ihumaqhuliuqat atautikkut ihumaqaqlutik – taimaalu angiqatigiikpaghutik.





QANUQ TITIRAQTUIYAAMIK IHUAQNIGHAKKUT PARNAIYAUTINIK INGMINGNUT-QAUYIHAUTIT

1. Kituuva pitquyauhimayuq hivulliqpaaq havauhighaq talvani Ihuaqnighakkt Parnaiyautinik titiraqtunik?
✓ Ihivriuriamik, takulugu *makpiraq 10*.
2. Hunauyuq aallatqiingniit akunnngani taapkua haamlatkut *Ihumagiyainik* taapkualu *Havaaghainik*?
✓ Ihivriuriamik, takulugu *makpiraq 11-12*.
3. Huuq atuqtauvakpa *Atuqtauyunik Qauyihautit*?
✓ Ihivriuriamik, takulugu *makpiraq 13*.
4. Huuq aghuurnaqqaa Havaaghat iniqtauyaamik qauyihagtauyaamiklu?
✓ Ihivriuriamik, takulugu *makpiraq 21-22*.
5. Kitut havauhiuvat atuqtaulaaqtut ilittuqhitiyaamik Ihuaqnighakkt Parnaiyautinik nunallaarnut?
✓ Ihivriuriamik, takulugu *makpiraq 21*.

Qaritauyakuurutinit Naunaiqhiviit

Ilittuqhitaaffuuyut haamlatkut ihuaqnighakkt parnaiyautinik ikayuutaulaaqtut parnaiyainiqmut havaaghanut, hapkua pivighat ihivriuqlugit.

Iqaluit Ihuaqnighakkt Parnaiyautit 2017-2022

https://www.iqaluit.ca/sites/default/files/english_5year.pdf

Nunagiyauyuq Yellowknife-mit Nunallaarmiut-Ihumagiplugit Ihuaqnighakkt Parnaiyautit 2010

https://www.yellowknife.ca/en/city-government/resources/Reports/Economic_Development/City_of_Yellowknife_Community_Based_Strategic_Plan_2010.pdf

Nunagiyauyuq Yellowknife-mit Iniqtauyumayut Piyumayuyullu 2019-2022

https://www.yellowknife.ca/en/city-government/resources/City_Council_and_Mayor/Councils_Goals_Objectives/STRATEGIC-PRIORITIES-2019-2022-ACTION-PLAN.pdf

Nunallaaq Hay River, Nunattiami, Ihuaqnighakkt Parnaiyautit 2019-2023

<https://hayriver.com/wp-content/uploads/2019/07/Hay-River-Strategic-Plan-2019-2023.pdf>

Nunallaaq Inuvik, Nunattiami, Ihuaqnighakkt Parnaiyautit 2016-2021

<https://www.inuvik.ca/en/town-hall/resources/Town-of-Inuvik-2016-2021-Strategic-Plan.pdf>

Nunallaaq Fort Smith, Nunattiami, Ihuaqnighakkt Parnaiyautit 2018

<https://www.fortsmith.ca/sites/default/files/E.%20Fort%20Smith%20Strategic%20Plan.pdf>



TAIMAAQTIRUTIT

Aghuurnatqiyauyuq havauhiq ihuaqnighakkut parnaiyainiqmut taimaa *aulaqtiriamik!* Ayuinniqhaunngitkaluaqlutik ihuaqnighakkut parnaiyainiqmut kihimi, ilihimalutik taimaa, qauhimaliqniaqtutit ilihimayaghaniklu ayuiqlutit qakugunnuaq *ilvit* ikpigiyaulutit ihuaqnighakkut parnaiyainiqmut ikayuqtiulutik pivighaulutiklu.

Amigaiqpalliapluni, ihuaqnighakkut parnaiyainiq takuyauvaktuq nunallaarmiunit iharianaqtutut haamlatkut kavamautainit hivunighaq nakuuhivaalliriamik inungnut, ilagiingnut, nunallaaqmullu. Talvuuna amihuuyut inuit ikayurumayut havauhiqnut ilittuqhitiplutik atuqtainik, ihumaqhuliuqhugit ihuaqhautighat, ikayuqhutiklu ilittuqhainiqmik inirumayainik, ihuaqnighakkut havauhiqnik, havaaghaniklu ihuaqtumik aallannguqtitirutighanik.

Iniqtaulluarumayuq titiraqtuiyunik atuqtittiyuniklu Ihuaqnighakkut Parnaiyautinik taimaa nunallaavit ihariagiyaait hivunighamilu ihumagiyauyut iniqtauyaamnuk ihuaqtukkut, naatkutigiiklutiklu. Atuqtauyut aallannguqpalliagumik, havauhiigut aulahimmaaqtumik nutaannguqtitirivaktuq.

Havaqatauplutit parnaiyaiyunut pivighanullu, ilvit, Katimaqatiillu, ilauyullu nunallaarnit havaghimmaaqpaktut taimaa uplumi Ihumagiyauyut akagu pinnguqtitaugiamik.

Qaffiuyut Kingulliqaat Taimaaqtiqvianit Ihumagiyaghat

Ilaupkailugit ilauyut

Angmaumayaamik ilaupkaiyaamiklu ihuaqnighakkut parnaiyaiyut havauhiinut aghuurnaqtuq aulattiriamik.

Naahurittiaqpakluhi, kihimi ihumagittiaqlugit.

Ihumaqhuliuqlutik ayuqnaqtunik iniqhiyumayaqaruvit – kihimi ihumagittiaqlugit.

Ikayuqtighaqhiuqlutik iharianaqqat.

Atauhiq nakuutqiyauyuq nunallaam avatiinik taapkua nunagiyauyut ilittuqhitiwangniaqtut amihunik naunaitkutainik. Nunallaarmik nakuuyumik ihuaqnighakkut parnaiyautiqarumik takunniruvit, kamahughimaittumik apuqlugit ayuiqvigilugillu huliyaait.

Iharianaqqat, aallannguqtitirivaklutik.

Kamahughimaittumik aallannguqtitirivaklutik Ihuaqnighakkut Parnaiyautinik iharianaqqat. Hunakiaq aulattianngitkumi, ihuaqhaqlugu, ahikkuuqtailiplugit ihumagiyait.

Ihuaqnighakkut Parnaiyautit ighinnaqtailugu iliqpingnit.

Titiraqhimalirungni Ihuaqnighakkut Parnaiyautit, ighinnaqtailugu hanikuniktaililugu. Uumayutut ihumagilugu tuhaqtittiplugu ilaayunut, ihivriuhugit iniqpalliyut qakugunnuraangat, quviahuutigiplugillu inittiaqhimayut.



UIGUAT

1. Ihumaliugaqnut Naunaitkutanut Havauhiit

Ihumaliugaqnut Naunaitkutatat timiqutinit ingilrutauyuq taimaa ilauyut ihumaqhuliugtunit ihumaqhuliuriamik amihunik aallatqiingnik uuktuqtaghanik parnaiyailugillu pitquhiinut avvaqnut.

Hanayaamik Ihumaliugaqnut Naunaitkutanik, nipitirutilingnik titiraaghaqaqlutik nivinngavighamiklu nipitiqvighaanik. Katimayunit hivuliqti (taamnatut Uqaqtiuyuq) apiqhuiyuq ilittuqhitiyuqluuniit atuqtauyumik ihariattiyunik ihuaqhautighanik kinguani ilauquiplugit katimayut ihumaqhuliuriamik. Ilauyut titiraquyauyut ihumaqhuliugainik, nuuttillugit tamangnik ihumaqhuliugat atuqhutik uqauhiqluanut uqauhiqnullu talvani Nipitirutilingnik titiraaghainit. Maliktaghaq taamna: atauhiqmik titiraaghaqaqlutik ihumaqhuliugainut.

Kinguani ilauyut – tamangnik atauttikut – nipitiqulugit titiraangit ikluam haanganut.

Havaqatigiiqulugit nipitiriplutik. Tautughutik ahiit titiraanginnik apiqhuiplutiklu ahiagut ihumaqhuliurnaqtuq.

Talvanngat, apirilugit tamangnik ilauyut ihivriuqhiyaamik ihumaqhuliugaqnik aviktuqlugillu avvaqnut. Taapkuatut, qaffiuyut ihumaqhuliugat ilaupkaigumik tubaqtittiniqmik qanukiaq, atauttimut katitauniaqtut. Havaaghat hapkua inirumik, illitturiniaqtutit taimaa 10-nik amihunikluuniit katiqhugaqnaqtutit.

Kinguani, unipkaaqlugit katimayut katiqhugainik, attiqlugu, naittumik naunaitkuhiqlugit pitquhiit.

Kingulliqaami, aviktuqlugit katiqhugat aghurnaqaaniigut. Ayuqnaittuq avikturiamik irininiigut taimaa tamangnik ilauyut tunilugit ivitaalingnik nipitirutilingnik apirilugit tamangnik iliurayaamik nipitirutilgit talvunga tallimanut katiqhuganut ihumagiyainnik aghurnaqtutut (tamangnik ilauyut atauhiinnaqmik iliurailaaqtut tikkuqaqhimayainut). Taimaaqpat havaangit, ilangi katiqhugat amigaittunik nipitirutiqaqniat – ilittuqhitiyuq angiqhimayunik aghurnaqaaniinut – ilangittauq ikittunik nipitirutiqaqniat. Havauhighat ilittuqhitiyauyut kinguani:

Havauhiq 1: *Apiqhuitik apiqhuutinik ilittuqhitiuhiluuniit atuqtauyumik ihumaqhuliuglugu. Titiraqtittilugit ilauyut ihumaqhuliugainik atuqhutik uqauhilluanik uqauhiqniklu talvani Nipitirutilingnik titiraaghanit nipitiqlugit ikluam haangani.*

Apiqhuutik/Atuqtauyuq

Ihumaliuqhimayuq 1

Ihumaliuqhimayuq 2

Ihumaliuqhimayuq 5

Ihumaliuqhimayuq 6


Ihumaliuqhimayuq 3

Ihumaliuqhimayuq 4


Ihumaliuqhimayuq 7




Havauhiq 2: *Aviktuqlugit ihumaqhuliugat aajjikkutariingnut avvaqnut.*



Havauhiq 3: *Angiqhimaluhi ihumaliuriamik atighaanut naunaitkutanullu tamangnut katitauhimayunut, avighimayut tamangnik ilitturittiaqnaqlugit. Atauttimuklugit tamaita katiqhugat. Iniqhimayuq taimaa ittughaq:*



Havauhiq 4: *Katiqhugat ihumaliuqlugit aghuurnighaigut taimaa ilauyut ivitaalingnik nipitiqulugit katiqhugaqnut aghuurnatqiyaunahugiyainut. Iniqhimayuq taimaa ittughaq:*



Taapkua tamangnik ilauyut takuinnarianikkamik qanuq ihumaqhuliugait ikayuutauvaktut taimaaqtiqvianut, taamna Ihumaliugaqnut Naunaitkutaq ikayuutauyuq katimayinut ihumagittiariamik, atauttimik iniqhinahuaqhutik, iniqniaqhimalugit inirumayaita.



2. Avatinik Ihivriughiyut Titiraaghat

Avatinik Ihivriughiyut: Havakvium Iluani

Ihumaaluutit aulayuittut *iluani* nunallaavit.

1. _____
2. _____
3. _____
4. _____
5. _____
6. _____
7. _____
8. _____
9. _____
10. _____

Avatinik Ihivriughiyut: Ilumiutat

Ihumaaluutit aulayuittut *hilataanit* nunallaavit.

1. _____
2. _____
3. _____
4. _____
5. _____
6. _____
7. _____
8. _____
9. _____
10. _____



3. HAHA-nut Qauyihautinut Titiraaghat

HAHA-nut qauyihautinit, havakvium iluani hilataanilu qauyihaivaktut tautughugit timiqutivit **Hakugingniit**, **Ayuqhautait**, **Havaaghat Amirnautilu**. HAHA-nut Qauyihautit ihumagiyaayughanik ilittuqhitivaktuq qanurininganiinut kitukiat havaaghat taimaalu unipkaaqtittilaaqhuni havauhghanik.

Kitut ihumagiyaavaktut hakugingniqtut ayuqhautitullu?

Hakugingniit piqtauyut ayuitalluuniit ikayuutaulaaqtut nunallaarnut iniqhiyaamik ihumagiyaainik. Taapkuatut, havaktighat ihumagiyaaulaaqtut hakugingniqtut.

Ayuqhautit piqutinut ayuitanullu ihuilutauyut kinguvaqtittivaktut iniqhiyaamik ihumagiyaainik, taapkuatut ihuilutilgit tuhaqtittiviit.


Hunauyut havaaghat amirnautilu?

Havaahat taapkuanguyut atuqtauyut nakuuyumik ikpingnautiqaqtuq timiqutinut. Kavamatuqanit manighautit ikayuutillu ihumagiyaaulaaqtut havaaghatut.

Amirnautilit aallanngayut havaaghanit. Hunaqutilgit ihuilutaulaaqtunik nunallaarnit kavamanut.

Naunaitkutaq ataani ikkuuqtuutighaq qanurittunik apiqhuutinik aullaqritauvaktut unipkaaqtunik HAHA-nik.

Ilumiutat Ihumagiyaaghat	
<p>Apiqhuutit hakugingniit mighaagut:</p> <ul style="list-style-type: none"> • Hunauyut nunagiyaayum ihuaqutait? • Qanuriliuqpakpat nunagiyaayug nakuuyumik? • Qanurittunik ihuaqutauyunik pivighaqaqqa nunagiyaayumi? • Hunanik aallat inuit tautukpakpat hakugingniqtut nunagiyaayumi? 	<p>Apiqhuutit ayuqhautit mighaagut:</p> <ul style="list-style-type: none"> • Qanuriliuqpakpat pittiaqhimaaittumik? • Humik ihuaqhivaalliaqniqqit? • Humik atuqtailiyughauvit?
Hilataanit Ihumagiyaaghat	
<p>Apiqhuutit havaaghat mighaagut:</p> <ul style="list-style-type: none"> • Kituuvat nakuuyut uukuqtaghat hivungni? • Kituuvat tajja ingilratjutaayut ilihimayatit (aallanngaqtiriyut kavamatkut maligaghaliuqhimayainit, inuuhiqattiarniqmut atuqtauyut, inugiangniit, pitquhiit, manighiurniq, qanuqlu). 	<p>Apiqhuutit amirnautilit mighaagut:</p> <ul style="list-style-type: none"> • Kitut ayuqhautit naahurivigit? • Amirnautiqaqqa hakugingnianut nunagiyaayug hila aallannguqpalliyumi? • Qanuriliuqtut avatingnit, ahinilu nunagiyaayunit? • Qanuq manighiurutit aallanguqpalliyavat? • Angiyut havakviuyut amiqhiyughauvat? • Qanuq nunaqyuami nunaptingnilu maligaghaliuqtit avatiit maligaliuqtilluuniit atuqtait aallanguqpalliyavat? • Qanuq inugiangniit aallannguqpalliyava?



4. Ihumagiyauyut, Havaaghat, Ikpigiyauyunullu Titiraaghat

Ihumagiyauyuq (naniittumavita hivunighami?)

Havaaghaq (huuq hamaniittugut)

Ikpigiyauyut (kitut aghurnaqtut uvaptingnut?)

1. _____
2. _____
3. _____
4. _____
5. _____
6. _____
7. _____
8. _____



5. Havaaghanik Parnaiyaiyut Titiraaghait

Havaaghanut Parnaiyautit: Tikitpalliyut Hamanngat Talvunga

Qakugu inirumayaptigit hapkua? _____

Kitut ilaupkaqtitauyughat? _____

Qanuq naahuriyauyut akighait? _____

Ayuqhautiqarniaqqa? Taimaitpat, qanuq ihuaqhainiaqqigit? _____

Ikpingnautiqaqqa ahinut havakvingnut, hunaqutinut aulapkaqtainullu? Angiqpat, qanuq? _____

Qanuq hapkua ikpingnautaniaqqat niuviqtinut ilaayunullu? _____

Aulapkaiyiryuanit angiqtauhimavat? _____

Havaaghanut parnaiyautit ihuaqqata maligaliqiyit havauhiigut? _____

Una hanaqiyauyughaq parnaiyautailu ikayuutavat ihumagiyaptingnut ikpigiyaptingnullu? _____



